



周易本義通釋序



宇宙間皆自然之易易皆自然
之天天不能畫假伏羲以畫天不能
言假文王周孔以言然則羲文周孔
之畫之言皆天也易言於象數而
天者具焉易作於卜筮而天者寓

焉善乎子朱子之言曰伏羲易自是伏羲
易文王周公易自是文王周公易孔
子易自是孔子易烏乎此其所以為
羲文周孔之天也必欲比而同之非
天矣易解凡幾百家支離文義者
无足道附會取象者尤失之蓋
凡可見者皆謂之象其或巧或拙或
密或疎皆天也易之取象壹是巧
且密焉非天矣惟邵子於先天而
明其画程子於後天而演其辭朱子
本義又合邵程而一之是於羲文
周孔之易而會其天者也學必有統

道必有傳邇其傳義文周孔之易
非朱子不能明要其統凡諸家解易
非本義不能一統其傳非今之所
能為也亦天也予此書融諸家之格
言釋本義之奧旨後之學易者或由是
而有得於本義則亦將有得於義文

周孔之天矣延祐丙辰春新安
後學胡炳文仲虎父序

周易總目

周易上經

乾




訟



泰



豫



噬嗑



大畜



周易下經

咸



明夷



坤



師



否



隨



賁



頤



恒



家人



屯



比



同人



蠱



剝



大過



遯



睽



蒙



小畜



大有



臨



復



坎



大壯



蹇



需



履



謙



觀



无妄



離



晉



解



Vertical handwritten text on the right side of the page, including the characters '周易' and other characters.

中孚	旅	震	升	損
小過	巽	艮	困	益
既濟	兌	漸	井	夫
未濟	渙	歸妹	革	姤
	節	豐	鼎	萃

周易十傳

彖上傳一

彖下傳二

象上傳三

象下傳四

繫辭上傳五

繫辭下傳六

文言傳七

說卦傳八

序卦傳九

雜卦傳十

周易本義通釋例

一先是集諸家易解名曰精義然未免失之太繁竊惟學有
 統一易至程朱明且備矣本義於程又能足其所未圓白
 其所未瑩貫其所未一於是一以本義為主而為之通釋
 一通釋之於本義依朱子集註例蓋集諸家之註為之也精
 義中取有合於本義者或一字或一句或一段或用其意
 不用其辭以故不可出諸家名氏已見附其中亦不表以
 愚謂

一通釋之名從勉齋黃氏例
 一觀朱子語錄本義有未改正者今通釋輒從朱子之志云

輯錄雲峯文集易義一卷

謹按易經大全凡例云二程文集遺書外書與朱子文集語類凡有及於易而有所發明者列於篇端自為一卷今觀先祖雲峯先生文集凡有與易經傳有所發明者亦輯錄附於篇端自為一卷云

九世孫胡珙謹識

雲峯與吳臨川書曰炳文迂踈无似有厚幣來聘者不往家事叢脞不問大率三百六旬暇不過十餘日孜孜矻矻相與講求經學嘗為易啓蒙通義又嘗集諸家易解有合本義者為通釋又嘗為六爻反對論及二體相易論凡六十篇皆已成書本義通釋則郭文卿守浮梁時為刊其半出之太早炳文今悔之无

及也刊本今以呈似中有繆戾閣下削之繩之幸甚幸甚是書嘗蒙薦剡獎許備極謂炳文能沉潜往聖之書能發揮先儒之論炳文用是愈加鞭策惟懼不能沉潜惟懼无所發揮以負知已

與紫巖汪先生書曰殫五十年心力四書周易等書雖不過發明朱子之說不能就正有道此為大不滿耳炳文年將八十詩書未嘗釋手自笑頭如雪而讀書之眼猶如月也

答敬存胡先生書曰吳可堂謂左揲掛一右亦掛一炳文答之曰如此則不是象三自是象四矣可堂堅守其說不肯改其僻也如此

答新安陳氏書曰僭以通釋為餽不知過沐賜之尊覽炳文思

之有二罪先是不能上求是正而遽爾公傳過之一也不及拜書請教二也

一承問曰本義乾九二剛健中正莫是剛健得中誤筆作中正如何炳文答曰凡言九五剛健中正六二柔順中正易之正例也乾九二剛健中正變例也程子曰中重於正正有不中中无不正本義盖取諸此然又非特程子意也爻之為九二者凡三十有二乾九二其始也未濟九二其終也未濟云云非正也夫子曰中以行正况乾六爻皆言聖人之事九二龍德正中本義以剛健中正許之恐非誤也尊見以為非是乞批教

一承問曰九三爻下云云炳文答曰按本義云九陽爻三陽位重剛不中居下之上乃危地也此全是解厲之一字盖以三之

地位言其有屬之象也乾本是剛之純健之至九三居上下乾之間又以剛居剛性體剛健所以有乾乾而惕之象也三之性體如此而其地又如此故有乾乾之象有惕之象有屬之象本義於文只得摠此三句而言之於屬有絕句正自不相關也尊見以為是否乞批教

潛越作本義通釋外嘗為啓蒙通釋義又嘗為六爻反對論及二體相易論凡五十八篇并序六十篇但未得求正於有道常以為恨年來老成凋謝異郡有蒞初異縣有先生不得以時參請如之何如之何

二十四氣論云卦氣正月為春天氣下降當為雨水二月大壯雷在天上當為驚蟄今曆先雨水而後驚蟄亦宜也按國語四

時有八風曆獨指清明風為三月節此風屬巽故也驚蟄者萬物出乎震震為雷也清明者萬物齊乎巽巽為風也巽曰潔齊故曰巽風曰清明有潔之義曆律亦有明潔之義又曰四月中小滿先儒云小雪後陽一日生一分積三十日陽生三十分而成一晝故為冬至小滿後陰生亦然夫四月乾之初謂之滿者姤初羸豕蹢躅坤初履霜堅冰羸喻其小蹢躅謂其滿霜喻其小堅冰喻其滿易言於一陰既生之後曆言於一陰方萌之初慮之深防之豫也小雪有大雪但此有小滿无大滿意可知矣初齋記曰易六位時成第一晝不言一而言初謹其幾之萌也乾則謹其陽之在下坤則謹乎陰之始疑明復齋記曰復造化陰靜而陽動世亂而治吾道屈而伸无有

往而不復者然必曰七日復由乎數人善端有時而復見亦无有不可復也復初九所謂不遠復者何事純粹至善也而吾自汨其初之性虛靈不昧也而吾自昏其初之心其為學非徒无益而已也然則古之儒者學焉惟在乎復

診脉樞機序曰易惟復曰无疾陽生於内也又曰无妄之疾曰有疾不可疾貞凡言疾者四其外專言疾者亦四豫損疾在陰爻鼎兌疾在陽爻脉浮數属陽沉遲属陰送醫人序曰易復彖曰无疾豫六五曰貞疾无妄九五曰无妄之疾損六四曰損其疾兌九四曰介疾復之无疾一陽生於下也餘言疾皆於外卦見之盖陽在内則无疾凡疾皆有感於外者也凡言疾者四有喜者三不死者一聖人好生之心可見至曰无妄之藥不可試

也試之一字其灼見後世為醫者之深患乎

伯善字說曰易卦之占亨多元亨少爻之占吉多元吉少元亨大善而亨元吉大善而吉也人之行事善百一大善千一故以元為貴然茲事也請論心坤初善不善皆自念慮之微處克之即是此善之至大處盖有一毫之不善非元也有一息之不善非元也

可權字說曰易卦於乾言立誠不言權坤言敬義立不言權恒言立不易方不言權盖易三百八十四爻只是一時字能隨時以處中即是此一權字卦言立不言權權固伏於三百八十四爻之中而不露爾

謙亨字說曰人與物能謙者天皆亨之也易三百八十四爻有

吉有凶有利有不利惟謙下三爻皆吉上三爻皆利他卦无有及之者文公先生感興詩第十八篇專為蒙學而設其首曰童蒙貴養正孫弟乃其方即易之所謂謙也其中言進趨極度恭進而謙也退而常端莊退而謙也庸言戒粗誕時行貴安詳一言一動皆貴乎謙也未曰十五志于學及時起高翔即謙之身矣謙亨年將十五謙卦於易之次亦為十五季脩字說曰文王九德皆反身自脩之事獨於損曰德之脩者蓋忿易發如山懲忿當如摧山慾易游如水窒慾當如止水通書曰君子終日乾乾不息於誠然必懲忿窒慾而後至易於乾曰脩業曰脩辭而未曰損德之脩其旨深哉蓋必有損也然後有脩必損其所當損也然後能脩其所當脩

伯裕字說曰易九卦所謂益德之裕也風雷相益而物受風雷之益者其生自裕君子遷善如雷之決則過易寡改過如風之速則善益增遷善改過相為益而其德自裕

孟善字說曰問曰他卦不言善獨言於乾坤者何曰易凡言吉凶悔吝无非教人為善善則吉大善則元吉不善而悔則凶亦吉首於乾坤發之例其餘也陽純而陰雜故乾言善坤言善不善又問坤言積善之慶者何曰坤陰卦也莫見乎隱莫顯乎微與隱皆屬乎陰慎獨之學當審其幾閑居不敢一不善之為念慮不敢一不善之萌是之謂積履上九曰視履考祥其旋元吉祥者慶之兆旋者慶之周至是無一念一事非善故坤曰有慶履曰大有慶又問曰乾元為善之長者何曰四德皆善元為之

長四時之春四端之仁皆元也然繼之者善不見於元而乃見於貞貞下起元是故一元起於貞萬善起於元又曰坤言積善之家以其善一身者善一家也乾言善世以其善一家者善一世也

節夫字說曰一年二十四氣中有節節者抑其過而歸之中也天地之數極於六十故易六十卦為節兌下坎上坎水之來无窮兌澤之容有限而止之始得其中其外爻象言節者凡四皆擬坎離言蹇九五坎中故曰以中節家人九二離剛不中故曰失家節鼎上九離剛能柔故曰剛柔節未濟水本潤下而坎又在下火本炎上而離又在上上九上卦之上也故曰不知節大抵易貴乎中中由於節故三百八十四爻之象獨以節之

一字終焉者以易始於乾終於未濟皆欲人得中所以皆欲人知節而未濟上九之所謂節即乾元用九之所謂天則也豈有能見天則而不能知節者哉節以求合乎中天則吾天然自有之中也

果齋箴曰坎水之流始于蒙泉不果其行曷至于川賢必希聖聖必希天果能此者人十已千孰為凡民孰為豪傑萬里之程一念之烈遷善而果雷驚電掣克己而果矢去川決乾為木果艮為果茲果剛在上茲柔而墮最戒悠悠亦忌瑣瑣志高力強果何不可

節齋箴曰易至節卦六十爻三百六十合天地節而四時成四時有中氣有節氣節也者抑其過而歸之中也節之吉且亨與

不節之嗟勸戒備矣六十四卦之終復戒之曰亦不知節也非
惟飲酒水火未濟有亨節義存焉歲曰天有節氣四時成歲人
能節性迺德之萃坎水下塞為兌之澤有限而止儲豐於畜言
失之放舌不可捫用失之侈生理曷存爵取節節樽取尊尊飲
不知止多不遘瘡保合於乾闔戶於坤欲不知止自斧其根所
貴者節知止有定養之以靜持之以敬恬吾身心培吾德業存
其固存節之又節

自強齋銘曰吾之此心與天同体唯天行健一息萬里朝期夕
斯始是終是不務勝人而務勝己乾壯大象請觀所以自強不
息非禮勿履

自強齋詩曰厲志先須異衆兕觀乾之象大哉詞莫輕操几從

師樂正是加飡努力時黃卷聖賢宜靜對青衿城闕戒荒嬉晝
為夜息何曾息鄰屋雞鳴正仰思

鄉賢祠記曰聖賢之生天地氣化相為循環冀在北岐周在西
魯在東春陵新安在南夫斯道絕續天也自北而南迭生聖賢
以續道統之傳非偶然也方今程朱之學行天下薄海內外遐
陬僻壤猶有學其學者况茲大好山水乃其雲之泰山河之崑
崙也哉詩不云乎維嶽降神生甫及申吾新安以之又云乎
高山仰止景行行止吾新安之士當以之

周易上經本義通釋卷之一

新安後學雲峯胡炳文 通
掌祠九世孫珙輯校

周易上經

周代名也易書名也其卦本伏羲所畫有交易變易之義故謂之易其辭則文王周公所繫故繫之周以其簡衷重大故分為上下兩篇經則伏羲之畫文王周公之辭也并孔子所作之傳十篇凡十二篇中間頗為諸儒所亂近世晁氏始正其失而未能盡合古文呂氏又更定著為經二卷傳十卷乃復孔氏之舊云○通曰解易者或以周字為普遍之義或以卦為文王所重必子朱子本義出然後其

說始定蓋周禮三易夏曰連山商曰歸藏文王之易命之曰周以別夏商也故本義斷然以周為代名三易經卦皆八其別皆六十四况禹謨已曰龜筮而箕子洪範曰貞曰悔則有内外爻矣故本義以六十四卦為伏羲所重而其辭則文王周公所係又上下經之分以文王周公之辭則簡泰重大不容不分為兩篇以伏羲所畫則易有交易變易之義交者陰陽之對待變者陰陽之流行經之分為兩也皆自然而然合三百八十四爻觀之上下經多少不齊在上經者宜陽多於陰今陽爻八十六陰爻九十四而陰之多於陽者八在下經者宜陰多於陽今陰爻九十八陽爻百有六而陽之多於陰者亦八以反對推之上下經各

十八卦各一百八爻可謂齊矣在上經者陽爻五十二陰爻五十六而陰之多於陽者四在下經者陰爻五十二陽爻五十六而陽之多於陰者亦四或四或八互為多少自然有陰陽相交之象焉上經首乾坤氣化之始也乾坤而後十卦陰陽各三十畫然後為泰為否而天地之交不交者可見矣下經首咸恒形化之始也咸恒而後十卦陰陽亦各三十畫然後為損為益而少男少女長男長女之交不交可見矣至若上經終坎離乾坤中爻之交下經終既濟未濟又坎離中男中女之交不交也程傳曰易變易也本義曰易有交易變易之義先交而後變本義之旨深矣哉

三三乾上

乾

六畫者伏羲所畫之卦也一者奇也陽之數也乾者健也陽之性也本註乾字三畫卦之名也下者內卦也上者外卦也經文乾字六畫卦之名也伏羲仰觀俯察見陰陽有奇耦之數故畫一奇以象陽畫一耦以象陰見一陰一陽有各生一陰一陽之象故自下而上再倍而三以成八卦見陽之性健而其成形之大者為天故三奇之卦名之乾而擬之於天也三畫已具八卦已成則又三倍其畫以成六畫而於八卦之上各加八卦以成六十四卦此卦六畫皆奇上下皆乾則陽之純而健之至也故乾之名天之象皆不易焉○通曰此伏

道曰此伏

義畫卦而文王以列之卦序之首者也夏連山首艮商歸藏首坤文王之易首乾易為明大分而作也觀先天橫圖乾居一圓圖乾居前義易固已如此矣本義曰一奇也陽之數也從象上說乾健也陽之性也從理上說程子曰至微者理至著者象朱子又即數與性發之當伏羲時有乾卦畫未有元亨利貞卦辭想占得乾卦者即乾六畫之象已自知有元亨利貞之理矣

元亨利貞

文王所繫之辭以斷一卦之吉凶所謂彖辭者也元大也亨通也利宜也貞正而固也文王以為乾道大通而至正故於筮得此卦而六爻皆不變者言其占當得大通而必利在正

固然後可以保其終也此聖人所以作易教人卜筮而可以開物成務之精意餘卦倣此○通曰元亨利貞諸家便分作四德解惟本義謂乾道大通而至正故筮得此卦而六爻皆不變者其占當得大通而必利在正固而後可以保其終愚按啓蒙非特六爻不變者占此乾三爻變或他卦三爻變之乾者亦兼以此占大通而至正天理之本然大通而必利在於正固人事之當然也乾為易第一卦占得之者事雖大通而非正固尚不能保其終况他卦乎故易六十四卦彖辭三十四言貞然則不貞者固不可以占也此聖人教人卜筮而可以開物成務之精意至夫子彖傳始以此四字分而二之如周子所謂元亨誠之通利貞誠之復夫子彖傳意也文言

始分而四之程子所謂元者萬物之始亨者萬物之通利者萬物之遂貞者萬物之成夫子文言意也

初九潛龍勿用

初九者卦下陽爻之名九畫卦者自下而上故以下爻為初陽數九為老七為少老變而少不變故謂陽爻為九潛龍勿用周公所繫之辭以斷一爻之吉凶所謂爻辭者也潛藏也龍陽物也初物在下未可施用故其象為潛龍其占曰勿用凡遇乾而此爻變者當觀此象而玩其占也餘爻倣此○通曰初二三四五上位之陰陽九六爻之陰陽未有六畫為爻先有六虛為位位虛而爻實之也初上先位而後爻自二至五先爻而後位五爻也時言初則有終位言上則有下數言

二三四五則有一六互見也潛初象龍陽物而靈變不測乾九象初陽在下未可施用於物則為潛龍之象於人則為勿用之占易之道辭變象占四者而已就此爻觀之九為變潛龍為象勿用為占初九潛龍勿用為象占之辭餘做此○乾初象潛龍護微陽也坤初象履霜防微陰也於陽之微則恐其或用勿也者禁之之辭也陰之微則慮其必盛至也者危之之辭也

九二見龍在田利見大人

二謂自下而上第二爻也後做此九二剛健中正出潛離隱澤及於物物所利見故其象為見龍在田其占為利見大人九二雖未得位而大人之德已著常人不足以當之故值此

爻之變者但為利見此人而已蓋亦謂在下之大人也此以爻與占者相為賓主自為一例若有見龍之德則為利見九五在上之大人矣○通曰龍九象見而在田二象以六畫則初二地位二地位故象田以三畫則二與五本人位故九二九五象大人九二方出潛而猶未大顯有大人之德未有大人之位者也本義謂常人不足以當之蓋如初九潛龍之象凡占者皆可當象占之正例也如九二見龍是象利見大人是占則以象為主占為客變例也

初二地位故二曰在田五上天位故五曰在天三四人位故三不稱龍稱君子下乾終而上乾繼之故曰乾乾本義釋乾健也陽之性也此釋乾乾亦曰性體剛健蓋健者乾之性龍不過乾之象九三不言象而言性性體剛健自有能乾乾夕惕之象也六爻惟三四言无咎以人位故也為人而頃刻不知憂懼動輒有過乾乾夕惕庶乎可以免過云尔

九四或躍在淵無咎

或者疑而未定之辭躍者無所緣而絕於地時未飛耳淵者上空下洞深昧不測之所龍之在是若下於田或躍而起則向乎天矣九陽四陰居上之下改革之際進退未定之時也

故其象如此其占能隨時進退則无咎也○通曰躍九陽動象淵四陰虛象見而在田猶未離乎地躍則无所緣而絕於地五天位四位柔而與之相接如淵上空下洞深昧不測而與天接或躍而起則向乎天矣其位上下之交其時進退未定之際躍以或言審於進也淵以在言安於退也

九五飛龍在天利見大人

剛健中正以居尊位如以聖人之德居聖人之位故其象如此而占法與九二同特所利見者在上之大人耳若有其位則為利見九二在下之大人也○通曰龍九象飛而在天五象本義於二五皆曰剛健中正九五以天德居天位剛健而純中正而粹者也文言曰剛健中正純粹精也其九五之謂

歟雲行雨施天下平也飛龍在天之事矣在田已雲行在天
乃雨施

上九亢龍有悔

上者最上一爻之名亢者過於上而不能下之意也陽極於
上動必有悔故其象占如此○通曰

用九見群龍無首吉

用九言凡筮得陽爻者皆用九而不用七蓋諸卦百九十二
陽爻之通例也以此卦純陽而居首故於此發之而聖人因
繫之辭使遇此卦而六爻皆變者即此占之蓋六陽皆變剛
而能柔吉之道也故為群龍無首之象而其占為如是則吉
也春秋傳曰乾之坤曰見群龍無首吉蓋即純坤卦辭牝馬
之貞先迷後得東北喪朋之意○通曰

三三坤上

坤元亨利牝馬之貞君子有攸往先迷後得主利西南得朋東

北喪朋安貞吉

一者耦也陰之數也坤者順也陰之性也註中者三畫卦之名也經中者六畫卦之名也陰之成形莫大於地此卦三畫皆耦故名坤而象地重之又得坤焉則是陰之純順之至故其名與象皆不易也牝馬順而健行者陽先陰後陽主義陰主利西南陰方東北陽方安順之為也貞健之守也遇此卦者其占為大亨而利以健順為貞如有所往則先迷後得而主於利往西南則得朋往東北則喪朋大抵能安於正則吉也○通曰乾言利貞貞則無所不利矣坤言利牝馬之貞如牝馬之貞則利非牝馬之貞則不利也下文曰後得曰得朋利也牝馬之貞故也坤但得乾之半故乾無不利而坤有利

曰先迷曰喪朋不利也非牝馬之貞故也

三三坤上

坤元亨利牝馬之貞君子有攸往先迷後得主利西南得朋東

北喪朋安貞吉

一者耦也陰之數也坤者順也陰之性也註中者三畫卦之名也經中者六畫卦之名也陰之成形莫大於地此卦三畫皆耦故名坤而象地重之又得坤焉則是陰之純順之至故其名與象皆不易也牝馬順而健行者陽先陰後陽主義陰主利西南陰方東北陽方安順之為也貞健之守也遇此卦者其占為大亨而利以健順為貞如有所往則先迷後得而主於利往西南則得朋往東北則喪朋大抵能安於正則吉也○通曰乾言利貞貞則無所不利矣坤言利牝馬之貞如牝馬之貞則利非牝馬之貞則不利也下文曰後得曰得朋利也牝馬之貞故也坤但得乾之半故乾無不利而坤有利

周易本義通釋

上

不利與下文主利之利不同陽主義乾有剛斷意陰主利坤有歛藏意又輕清主義重濁主利安貞分而言之安者順之為貞者健之守合而言之則以順乎健為正

初六履霜堅冰至

六陰爻之名陰數六老而八少故謂陰爻為六也霜陰所結氣盛則水凍而為冰此爻陰始生於下其端甚微而其勢必盛故其象如履霜則知堅冰之將至也夫陰陽者造化之本不能相無而消長有常亦非人所能損益也然陽主生陰主殺則其類有淑慝之分焉故聖人作易於其不能相無者既以仁義健順之屬明之而無所偏主至其消長之際淑慝之分則未嘗不致其扶陽抑陰之意焉蓋所以贊化育而參天地其

旨深矣不言其占者謹微之意已可見於象中矣○通曰履初象霜一陰象堅冰六陰象至危之之辭本義如此爻特詳焉者易交易也變易也交易者對待之陰陽陽之性剛為仁禮陰之性順為義智不能相無者也變易者流行之陰陽消長之際陽為生為淑為君子陰為殺為慝為小人聖人未嘗不致其扶陽抑陰之意履霜而知堅冰之將至羸豕而知躅躅之有孚姤之一陰即坤初陰也其謹微之意可見矣乾有陽主發見潛龍則明其未見坤之陰主隱伏履霜則彰其已至君子進之難而小人進之易也乾六爻皆取龍為象坤之取象曰履霜曰直方曰含章曰括囊曰黃裳曰其血玄黃不一而足陽純而陰雜也

六二直方大不習無不利

柔順真固坤之直也賦形有定坤之方也德合無疆坤之大也六二順柔而中正又得坤道之純者故其德內直外方而又盛大不待學習而直不利占者有其德則其占古如是也○通曰乾五爻皆取象惟九三獨指其性體剛健言之坤五爻皆取象惟六二獨指其性體柔順者言之初三五柔順而不正四上柔順而不中惟六二柔順中正得坤道之純者也正則內直中則外方直則生物不可撓方則賦形不可移易內直外方其德自然盛大不待習熟而無不利占者如之亦自然無不利也初六占在象中六二象在象中學者會於辭意之表可也或曰乾天道也主九五坤地道也主六二直方大地道

備矣

六三含章可貞或從王事无成有終

六陰三陽內含章美可貞以守然居下之上不終含藏故或時出而從上之事則始雖无成而後必有終爻有此象故戒占者有此德則如此占也○通曰含晦不露六象剛柔雜而成章六居三象六不足於貞而剛足以守有可貞象居下卦之上故有或從王事之象居下卦之終故其占曰有終大抵陽主進陰主退乾九三陽居陽故曰乾乾其德主乎進也坤六四陰居陰故曰括囊其位主乎退也乾九四陽居陰坤六三陰居陽故皆曰或進退未定之際也特其退也曰在淵曰含章可貞惟進則皆曰或聖人不欲人之急於進也如此哉

三多凶故聖人首於乾坤之第三爻其辭又獨詳焉

六四括囊無咎无譽

括囊言結括囊口而不出也譽者過實之名謹密如是則无咎而亦无譽矣六四重陰不中故其象占如此盖或事當謹密或時當隱遁也○通曰陰虛能受有囊象六三含章六四括囊皆取含蓄不露之象六三以陰居陽猶或可出從王事六四陰居陰惟可括囊不出而已或事當謹或時當隱遁皆不可出也

六五黃裳元吉

黃中色裳下飾六五以陰居尊中順之德克於內而見於外故其象如此而其占為大善之吉占者德必如是則其占亦

如是矣春秋傳南蒯將叛筮得此爻以為大吉子服惠伯曰忠信之事則可不然必敗外強內温忠也和以率貞信也故曰黃裳元吉黃中之色也裳下之飾也元善之長也中不忠不得其色下不共不得其飾事不善不得其極且夫易不可以占險三者有關筮雖當未也後蒯果敗此可以見占法矣○通曰坤言黃則知乾之為玄坤言裳則知乾之為衣然離六二象黃離遯六二象黃牛裳又下象坤六二象黃裳可也何乃於六五言之盖六二陰而在下柔順中正自然無不利六五以陰居尊非有中順之德克諸內而見諸外必不能大善而吉黃中之象裳順之象中順之德有諸中自然形諸外如此則大吉不如此則大凶言外之意可見也左氏傳載占

筮不一本義於此爻載南蒯事為詳可以見易之占為君子謀非小人盜賊可竊而用也

上六龍戰于野其血玄黃

陰盛之極至與陽爭兩敗俱傷其象如此占者如是其凶可知○通曰坤六爻皆臣而下卦之上曰王事有君也六爻皆陰而上卦之上曰龍有陽也不言陰與陽戰而曰龍戰于野與春秋書王師敗績于茅戎書天王狩于河陽同一書法也兩敗俱傷其色玄黃陰雖極盛豈能獨傷陽哉○初上取象小人之情狀著矣曰堅冰至者防龍戰于野之禍於其始曰龍戰于野者著堅冰之至於其終也

用六利永貞

用六言凡得陰爻者皆用六不用八亦通例也以此卦純陰而居首故發之遇此卦而六爻俱變者其占如此辭蓋陰柔不能固守變而為陽則能永貞矣故戒占者以利永貞即乾之利貞也自坤而變故不足於元亨云○通曰坤安貞變而為乾則為永貞安者順而不動永者健而不息乾變坤剛而能柔坤變乾雖柔必強善變化氣質者當如之陽先於陰而陽之極不為首陰小於陽而陰之極以大終善撫世變者當知之

三三震上下

屯元亨利貞勿用有攸往利建侯

震坎皆三畫卦之名震一陽動於二陰之下故其德為動其

象為雷坎一陽陷於二陰之間故其德為陷為險其象為雲
 為雨為水屯六畫卦之名也難也物始生而未通之意故其
 為字象草穿地始出而未申也其卦以震遇坎乾坤始交而
 遇險陷故其名為屯震動在下坎險在上是能動乎險中能
 動雖可以亨而在險則宜守貞而未可遽進故筮得之者其
 占為大亨而利於貞但未可遽有所往耳又初九陽居陰下
 而為成卦之主是能以賢下人得民而可君之象故筮立君
 者遇之則吉也○通曰屯蒙繼乾坤之後上下体有震坎艮
 坤交乾而成也震則乾坤之始交故先焉初以一陽居陰下
 而為成卦之主元亨震之動利貞為震遇坎而言也非不利
 有攸往不可輕用以往也易言利建侯者二豫建侯上震也

屯建侯下震也震長子震驚百里皆有侯象

初九磐桓利居貞利建侯

磐桓難進之貌屯難之初以陽在下又居動体而上應陰柔
 險陷之爻故有磐桓之象然居得其正故其占利於居貞又
 本成卦之主以陽在下為民所歸侯之象也故其象又如此
 而占者如是則利建以為侯也○通曰文王卦辭有專主成
 卦之主而言者周公首於此爻之辭發之卦主震震主初初
 磐桓即勿用有攸往利居貞即利貞卦言利建侯者其事也
 利於建初以為侯也爻言利建侯者其人也如初之才利建
 之為侯也爻言磐桓主為侯者而言宜緩卦言利建侯而不
 寧主建侯者而言不宜緩

六二屯如遭如乘馬班如匪寇婚媾女子貞不字十年乃字
 班分布不進之貌字許嫁也禮曰女子許嫁笄而字六二陰
 柔中正有應於上而乘初剛故為所難而遭回不進然初非
 為寇也乃求與已為婚媾耳但已守正故不之許至於十年
 數窮理極則妄求者去正應者合而可許矣爻有此象故因
 以戒占者○通曰屯以時言塞而未遽通也遭以遇屯之時
 者言回而未遽進也乘初之震震於馬為作足故有乘馬象
 屯者陰陽之始交二與四陰居陰初與五陽居陽二應五四
 應初皆曰婚媾取陰陽之始交也互体坤坤數十王弼曰屯
 難之世其勢不過十年以數言也○本義謂至於十年數窮
 理極妄求者去正應者合妄求非理而求也正應以理而應

也是故君子處屯不徒于其數而于其理○或曰凡用九不
 可為首凡用六必永貞屯初九磐桓居貞即不可為首之義
 六二女貞不字即永貞之義屯繼乾坤之後故首發之

六三即鹿無虞惟入于林中君子幾不如舍往吝

陰柔居下不中不正上无正應妄行取困為逐鹿無虞陷入
 林中之象君子見幾不如舍去若往逐而不舍必至羞吝戒
 占者宜如是也○通曰鹿陽物疑指五言虞翻王肅以鹿為
 鉅鹿沙鹿之鹿三五互艮三在艮山之下有鹿象無虞上无
 正應之象下体震震動也初九利居貞猶戒其輕動六二貞
 不字喜其不輕動六三不中不正上无正應而妄動取困必
 矣故有逐鹿无虞陷入林中之象幾者動之微六三互体艮

聖人於其震之動而猶庶幾其知艮之止故勉之曰不如舍欲其止也懼之曰往吝戒其動也

六四乘馬班如求婚媾往吉无不利
陰柔居屯不能上進故為乘馬班如之象然初九守正居下以應於已故其占為下求婚媾則吉也○通曰乘馬四應初象求婚媾初求四象六三往吝六四往吉无不利兩往字不同凡爻例上為往下為來六四下而從初亦謂之往者據我適人於文當言往不可言求如需上六三人來據人適我可謂之來不可謂往又變例也男下女為婚初下二婚媾也二之不字非應也初下四求婚媾也四之往者應也士夫有不待求而往讀二四爻亦可媿矣諸家求婚媾為四求初惟本

義謂初居下而應於已四待下之求而後往則吉必如是而後合男女婚姻之禮必如是而後見士夫出處之義

九五屯其膏小貞吉大貞凶

九五雖以陽剛中正居尊位然當屯之時陷於險中雖有六二正應而陰柔才弱不足以濟初九得民於下衆皆歸之九五坎体有膏潤而不得施為屯其膏之象占者以處小事則守真猶可獲吉以處大事則雖正而不免於凶○通曰六爻惟二五言屯二在下而柔五剛而陷於柔皆非濟屯之才二曰屯如時之屯也五曰屯其膏五自屯之也可以施而不施自屯其膏出納之吝有司之事非大君之道也故占者以處小事守貞猶可獲吉以處大事雖貞亦凶也○學易者責於

觀時識變卦有二陽初陽在下而眾方歸之時之方來也五陽在上而陷於陰時之已去也時已去則陽剛亦无如之何矣故凶

上六乘馬班如泣血連如

陰柔無應處屯之終進无所之憂懼而已故其象如此○通曰坎於馬為美脊上乘五有乘馬之象爻言乘馬班如者三二班如待五應也四班如待初應也上陰柔無應處屯之終其班如也獨无所待進又无所之憂懼而已蓋初得時二比初亦得之上比五亦失之



艮坎上

蒙亨匪我求童蒙童蒙求我初筮告再三瀆瀆則不告利貞

艮亦三畫卦之名一陽止於二陰之上故其德為止其象為山蒙昧也物生之初蒙昧未明也其卦以坎遇艮山下有險蒙之地也內險外止蒙之意也故其名為蒙亨以下占辭也九二內卦之主以剛居中能發人之蒙者而與六五陰陽相應故遇此卦者有亨道也我二也童蒙幼稚而蒙昧謂五也筮者明則人當求我而其亨在人筮者暗則我當求人而亨在我人求我者當視其可否而應之我求人者當致其精一而扣之而明者之養蒙與蒙者之自養又皆利於以貞也○通曰有天地即有君師乾坤之後繼以屯主震之一陽而曰利建侯君道也又繼以蒙主坎之一陽而曰童蒙求我師道也君師之道皆利於貞諸家訓亨皆與利貞亨屬蒙利貞屬

養蒙者本義曰筮者明則人當求我而亨在人筮者暗則我當求人而亨在我蒙與養蒙者皆利貞此先師教人以讀易之法易必如是者方為不滯

初六發蒙利用刑人用說桎梏以往吝

以陰居下蒙之甚也占者遇此當發其蒙然發之之道當痛懲而暫舍之以觀其後若遂往而不舍則致羞吝矣戒占者當如是也○通曰發初象刑桎梏皆坎象以陰居下下民之蒙蒙之甚者也當於其初發之發之之道寬嚴貴適宜刑人痛懲之也說桎梏暫舍之以觀其後也痛懲而不暫舍一於嚴以往是不知有敬敷五教在寬之道故吝

九二包蒙吉納婦吉子克家

九二以陽剛為內卦之主統治群陰當發蒙之任者然所治既廣物性不齊不可一槩取必而爻之德剛而不過為能有所包容之象又以陽受陰為納婦之象又居下位而能任上事為子克家之象故占者有其德而當其事則如是而吉也○通曰此爻具三象義各不同兩吉字是兩占辭包蒙納婦是兩象諸家解此比而同之本義三象字兩又字見得三句取象自具三義觀此最可見易凡例包蒙包上下四陰也納婦納六五一陰也包與納二虛能受之象克九剛能任之象一六五也性陰有蒙象陰應陽有婦象位尊有父象以五之一爻而取象不同如此又於應爻見之易之不可為典要如此哉乾父坤母繼以屯蒙故兩卦提出兩子字必如屯六二

貞不字可以為女子矣必如蒙九二克家可以為男子矣○
初爻統說治蒙之理餘三四五皆是蒙者治蒙只在陽爻而
九二為治蒙之主

六三勿用取女見金夫不有躬无攸利

六三陰柔不中不正女之見金夫而不能有其身之象也
遇之則其取女必得如是之人無所利矣金夫蓋以金賂已
而挑之若魯秋胡之為者○通曰屯以許嫁婚媾論蒙以納
婦取女論屯六二乘初之剛而貞不字蒙六三乘二之剛而
不有躬屯二舍下而從五下体震震性動而趨上也蒙三舍
上而從二下体坎坎性險而趨下也其相去何遼絕哉况三
乃屯四之反在四則求而後往吉无不利在三則不求而往

取之无攸利其不善變何如此哉女一失身且如此士而失
身於所從用之何利焉諸爻皆說蒙此爻獨不取蒙義恐人
拘泥故別發一義况昧其所適見利忘身蒙不足以盡之○
或曰是爻蠱之變女惑男也故有不有躬之事

六四困蒙吝

既遠於陽又无正應為困於蒙之象占者如是可羞吝也能
求剛明之德而親近之則可免矣○通曰初與三比二之陽
五比上之陽初三五皆陽位而三五又皆與陽應惟六四所
比所應所居皆陰困於蒙者也蒙豈有不可教者不能親師
取友其困而吝也自取之也

六五童蒙吉

柔中居尊下應九二純一未發以聽於人故其象為童蒙而其占為如是則吉也○通曰屯所主在初卦曰利建侯而爻於初言之蒙所主在二卦曰童蒙求我而爻於五言之五應二者也知童蒙之為五則知我之為二矣童蒙純一未發以聽於人五居尊位而能以童蒙自處一聽於九二其吉可知上九擊蒙不利為寇利禦寇

以剛居上治蒙過剛故為擊蒙之象然取必太過攻治太深則必反為之害惟擇其外誘以全其真純則雖過於嚴密乃為得宜故戒占者如此凡事皆然不止為誨人也○通曰本義此文與釋九二爻相應蓋所治既廣而又攻治太深物性不齊不可一槩取必而又取必太過是欲去其害而反為害

者也故曰不利為寇人性純一未發之蒙不能不為知所誘之物所化惟為之擇其外誘以全其真純雖過於嚴乃得其宜故曰利禦寇且曰凡事皆然不特為誨人也朱子之教人可謂精且備矣

三三 坎乾上下

需有孚光亨貞吉利涉大川

需待也以乾遇坎乾健坎險以剛遇險而不遽進以陷於險待之義也孚信之在中者也其卦九五以坎體中實陽剛中正而居尊位為有孚得正之象坎水在前乾健臨之將涉水而不輕進之象故占者為有所待而能有信則光亨矣若又得正則吉而利涉大川正固无所不利而涉川尤貴於能待

則不欲速而犯難也。○通曰：需待也。乾陽在下，皆有所需。九五坎陽在上，又為衆所需，需而无實无光，且亨之時，需而非正，无吉且利之理。世有心雖誠實而處事或有未正者，故曰：孚又曰貞貞吉。程子以此為既貞且吉，本義以為得貞且吉當辨也。本義以孚與貞歸之九五，且曰：占者有所待而能孚則光亨，又得正則吉而利涉大川，豈獨九五可用哉？卦辭言利涉大川者，七需首言之，蓋涉川不待而爭先，反致濡滯甚者，覆溺亦多矣。此本義所以曰：涉川尤貴於能待也。○需主事孚，主心乾，知險而需，所以為君子之謀。

初九需于郊，利用恒无咎。

郊曠遠之地，未近於險之象也。而初九陽剛，又有能恒於其所之象，故戒占者能如是，則无咎也。○通曰：郊坎險最遠之象，國外曰郊，同人以象上九，此以象初皆取其遠也。同人于門于宗而後于郊，近而遠也；需于郊而後于沙于泥，遠而近也。初能需于曠遠之地，而又戒之以利用恒者，身不輕進，必至不妄動，斯无咎也。

九二需于沙，小有言終吉。

沙則近於險矣，言語之傷亦灾害之小者，漸進近坎，故有此象。剛中能需，故得終吉，戒占者當如是也。○通曰：沙近坎水之象，或曰沙得水而不陷，剛實居中之象，小有言害之小者，近坎象初最遠，坎利用恒，乃無咎。九二漸近坎，小有言矣。而曰終吉者，初九以剛居剛，恐其躁急，故雖遠險猶有戒辭。九

二以剛居柔性寬而得中故雖近險而不害其為吉

九三需于泥致寇至

泥將陷於險矣寇則害之大者九三去險愈近而過剛不中故其象如此○通曰泥逼險寇害之大者皆坎象需與漸皆取有待而進之義需內卦于知于沙于泥由平原而水際水際非人所安也漸內卦于干于磐于陸由水際而平原平原非鴻所安也需之三逼坎而曰致寇至漸之三互坎而曰利禦寇禦寇者良剛而能止致寇者乾剛而不中也致之一字罪在三矣險何嘗逼三三急於求進自逼於險尔

六四需于血出自穴

血者殺傷之地穴者險陷之所四交坎体入乎險矣故為需

皆以三危地故也

于血之象然柔得其正需而不進故又為出自穴之象占者如是則雖在傷地而終得出也○通曰血坎水象穴坎險象血者陽之傷穴者陰之陷四入坎險有傷故有需于血之象出自穴諸家以為三陽方來四出而不安於穴本義以為四陰柔得正可出而不陷於穴夫以小畜之時下三陽並進而四六當之其終也猶血去惕出需之時三陽非急於進者四需于血而終得出自穴者宜也以為不安於其穴者過矣

九五需于酒食貞吉

酒食宴樂之具言安以待之九五陽剛中正需于尊位故有此象占者如是而貞固則吉也○通曰酒食坎象開闢以來生民有欲莫大於飲食男女屯蒙卦爻既於婚媾之正三致

意焉此復以飲食之正言之五有剛中之德時乎當需且宜
需于酒食安以待之况在下者乎五需于酒食惟正乃吉况
在下而可宴酣无度乎本義曰占者如是而正固則吉其教
人之意切矣○或曰下三陽待五而進九五需于酒食將以
待之也

上六入于穴有不速之客三人來敬之終吉

陰居險極无復有需有陷而入穴之象下應九三九三與下
二陽需極並進為不速客三人之象柔不能禦而能順之有
敬之之象占者當陷險中然於非意之來敬以待之則得終
吉也○通曰入于穴陰極而陷之象速者主召客之辭三人
乾三陽之象下三陽非皆與上應也有不速之象上柔順有

敬之之象上獨不言需險之極无復有需也外卦險体二陰皆有
穴象四出而穴而上則入于穴何哉六四柔正能需猶可出
于險故曰出者許其將然也上六柔而當險之終无復能需
惟入于險而已故曰入者言其已然也然雖已入于險非意
之來敬之終吉君子未嘗无處險之道也乾居西北故乾為
客乾內卦也自內而之外為客坎為盜坎外卦也自外而侵
內為寇九三逼乎坎故為寇之至則以為自我致之上六遠
乎乾故於客之來則非自我速之自我致之者敬慎猶可以
不敗不自我速之而能敬之其終吉也宜矣○

三三坎下
乾上下

訟有孚窒惕中吉終凶利見大人不利涉大川

訟爭辨也上乾下坎乾剛坎險上剛以制其下下險以伺其上又為內險而外健又為已險而被健皆訟之道也九二中實上无應與又為加憂且於卦變自遯而來為剛來居二而當下卦之中有有孚而見窒能懼而得中之象上九過剛居訟之極有終極其訟之象九五剛健中正以居尊位有大人之象以剛乘險以實履陷有不利涉大川之象故戒占者必有爭辯之事而隨其所處為吉凶也○通曰屯蒙之後繼以需訟需由於屯世不屯无需訟由於蒙人不蒙无訟然需非有孚時至何用訟非有孚情得必窮故二卦皆以坎之中爻有孚為主特需之坎在上為光為亨訟之坎在下為窒為惕

窒惕者光亨之反也本義謂涉險尤貴於能待就需待之義說利涉以剛乘險以實履陷就爭訟之危說不利涉其義精矣大抵能安於其分則為需以相待不安其分則為訟而相持故需卦辭有吉无凶有利无不利於訟則曰如是而吉如是而凶如是而利如是而不利別白而言之本義謂隨其所處為吉凶蓋拳拳欲戢人之訟而已○六爻柔不能訟剛者能訟二四可訟二陷陰中而窒故不克○承五而惕故亦不克訟五剛中正訟之極善上九剛過乘五故凶○天子主諸侯有司主庶人訟非特士庶之爭

初六不永所事小有言吉

陰柔居下不能終訟故其象占如此○通曰初不曰不永訟

而曰不永所事事之初猶異其不成訟也小有言與需不同
需小有言近坎也人不能不小有言也此之小有言坎也我
不能已而小有言也終吉之終與卦辭終凶之終不同終凶
者上九在訟為終在人為不終終吉者初六在訟為不終在
人為有終○凡陰爻不好訟而陽爻好訟

九二不克訟歸而逋其邑人三百戶无眚

九二陽剛為險之主本欲訟者也然以剛居柔得下之中而
上應九五陽剛居尊勢不可敵故其象占如此邑人三百戶
邑之小者言自處卑約以免災患占者如是則無眚矣○通
曰九二九四皆以剛居柔故皆不克訟但九四居健體之初
非能用其健者九二為險體之主則本欲用其險者本義謂

本欲訟蓋誅其心而言之也但以九五勢不可敵故從而退
避省約然則二之不克訟非不能也勢不可也故僅可以无
眚焉尔○或曰九自遯之三來歸三復成遯有逋之象又曰
三百戶者屯蒙需訟凡四坎也一坎得乾坤之策八十四四
坎三百三十有六也歸而逋則餘策三百當三百戶之象此
說蓋得之學邵堯夫之數學者○或曰非正說也以本義說
卦變係是九二六三二爻故備之此馮氏說以邵子數象推
之則坎震本屬三數

六三食舊德貞厲終吉或從王事无成

食猶食邑之食言所享也六三陰柔非能訟者故守舊居正
則雖危而終吉然或出而從上之事則亦必无成功占者守

常而不出則善也。○通曰：食舊德與位乎天德語同，位必稱德而居，故寧德過其位，毋位過其德。食必稱德而食，故寧德浮于食，毋食浮于德。食猶食邑之食，九二邑人三百戶食之最約者也。二剛險本欲訟者，能退處於分之二，小僅可無眚。三陰柔本不能訟，能安守其分之常，雖厲猶吉。謂之貞者，守常則為貞，不守常則非貞也。曰貞曰或，從王事无成與坤六三爻辭同。此獨不曰有終者，三下卦之終也在坤之三，而或出始雖無成而後猶可有終在訟之三，而出但見其无成而已。訟固非可終者，本義曰：占者守常而不出則善也。蓋守常而或出則非真能守者矣，深戒之也。○或曰：舊者二本六之所居，九歸逋于三，則二可以食其舊矣。始在三而厲終居二，則

吉二應五有從王事之象

九四不克訟復即命渝安貞吉

即就也，命正理也。渝變也。九四剛而不中，故有訟象。以其居柔故又為不克而復就正理。渝變其心安處於正之象。占者如是則吉也。○通曰：命有指理而言者，有指氣而言者。否六四曰：有命，指氣言也。此曰：即命，指理言也。皆上乾故皆曰命。之不克訟與九二不同。九二坎體其心本險，九四乾體其心能安乎天理之正，故吉。然曰歸曰渝，皆知反者。九二識時勢能反而安其分之二，九四明義理能變而安於命之正。聖人不貴无過而貴改過，又如此。

九五訟元吉

陽剛中正以居尊位聽訟而得其平者也占者遇之訟而有理必獲伸矣○通曰九五剛健中正聽訟必得其平然古人不責聽訟貴无訟初不永訟三不訟四二不克訟在下皆无訟此九五所以於訟為元吉也

上九或錫之鞶帶終朝三褫之

鞶帶命服之飾褫奪也以剛居訟極終訟而能勝之故有錫命受服之象然以訟得之豈能安久故又有終朝三褫之象其占為終訟无理而或取勝然其所得終必失之聖人為戒之意深矣○通曰或設若也非必之辭上九過於剛設若勝訟而得鞶帶終朝且三褫之况鞶帶命服以錫有德非以賞訟也豈有必得之理甚言訟之不可終也初不言訟杜其始

也上不言訟惡其終也聖人只欲人无訟故諸爻皆隨其所處而教之如九四九二剛而能柔許之曰无咎吉初六三柔能應剛許之曰終吉惟上九以剛極處訟終卦辭所謂終凶者也故又設此以戒之

三三坎下

師貞丈人吉无咎

師兵衆也下坎上坤坎險坤順坎水坤地古者寓兵於農伏至險於大順藏不測於至靜之中又卦惟九二一陽居下卦之中為將之象上下五陰順而從之為衆之象九二以剛居下而用事六五以柔居上而任之為人君命將出師之象故其卦之名曰師丈人長老之稱用師之道利於得正而為

成之人乃得吉而无咎戒占者亦必如是也○通曰乾坤而後屯蒙師旅皆有坎險之一體與師動衆尤見其最險者也坎水之險伏於坤地之中猶古者伏兵於農大順至靜之中有至險不測者藏焉必不得已然後用之故用師之道貴乎得正然必得老成之人而後吉必吉而後无悔師不貞不吉貞而不用丈人不吉其咎可知師之反為比比曰貞師言貞不言元帝王皆為應兵不為戎首也

初六師出以律否臧凶

律法也否臧謂不善也晁氏曰否字先儒多作不是也在卦之初為師之始出師之道當謹其始以律則吉不臧則凶戒占者當謹始而守法也○通曰出初之象律坎之象天下事

皆當謹始况用兵之始一有不善兵衆亂矣本義曰戒占者當謹始而守法六才柔故有不臧之戒然以律不言吉否臧則言凶者律令謹嚴出師之常其勝負猶未可知也故不言吉出而失律凶立見矣

九二在師中吉无咎王三錫命

九二在下為衆陰所歸而有剛中之德上應於五而為所寵任故其象占如此○通曰卦辭師貞丈人吉无咎爻在師中吉无咎即卦辭意也中則无過无不及所以為貞在師而中所以為丈人故師六爻惟九二吉无咎六四无咎不言吉三則凶矣二曰王三錫命五應也五長子帥師二應也五應二故曰錫訟之上近五非應故曰或錫訟而終則有三禡之辱

師而中則有三錫之寵訟與師皆以中為貴也

六三師或輿尸凶

輿尸謂師徒撓敗輿尸而歸也以陰居陽才弱志剛不中不正而犯非其分故其象占如此○通曰剝一陽在上而衆陰載之有得輿象六三衆陰在上如積尸而坤為輿坎為車輪有輿尸象此文甚言師徒撓敗之凶以見師之成敗生死皆係於將九二剛中可用師六四柔正猶能全師而退六三不中不正才弱志剛輿尸而歸其凶何哉

六四師左次无咎

左次謂退舍也陰柔不中而居陰得正故其象如此全師以退賢於六三遠矣故其占如此○通曰訟與師皆非得已與

其進而敗不若退之為愈訟歸逋復命師左次皆善其退春秋魯僖公元年書次于聶北遂救邢救而書次譏之也四年次于涇遂伐楚伐而書次善之也然則六四之左次无咎善之之辭也

六五田有禽利執言无咎長子帥師弟子輿尸貞凶

六五用師之主柔順而中不為兵端者也敵加於已不得已而應之故為田有禽之象而其占利以搏執而无咎也言語辭也長子九二也弟子三四也又戒占者專於委任若使君子任事而又使小人參之則是使之輿尸而歸故雖貞而亦不免於凶也○通曰田有禽不得已而執之非有從禽之心猶敵來不得已而應之非為兵端也於師而言田者古者无

事歲三田亦以習武也師田皆用坤象象二三四皆將也五任將者也五任二長子為將又使六三弟子參之與尸之敗必矣三爻辭曰師或輿尸或者非必之辭蓋謂六三為將其敗未必至於輿尸也而或輿尸凶何如哉危之之辭而不忍必言之也至五則直書曰弟子與尸蓋謂五用二而又用三必至於如此故長子帥師不言吉而弟子則直書曰輿尸貞凶甚言五之任將不可不審且專也長子即彖所謂丈人也自衆尊之則曰丈人自君稱之則曰長子皆長老之稱彖言師必用老成則既貞又吉爻言用老成而或以新進參之雖貞亦凶吉凶之鑒昭然矣○五陰柔之主故有戒

上六大君有命開國承家小人勿用

師之終順之極論功行賞之時也坤為土故有開國承家之象然小人則雖有功亦不可使之得有爵土但優以金帛可也戒行賞之人於小人則不可用此占而小人遇之亦不用此爻也○通曰初師之始故紀其出師而有律上師之終故紀其還而賞功六爻中出師駐師將兵將將伐罪賞功靡所不載其終始節次嚴矣末曰小人勿用則又戒辭也夫師之中未必皆君子不賞之无以報前日之功或用之必至於階後日之禍是不容以无虞之矣朱子嘗曰如舜封象于庠而使吏治其國如漢光武封功臣而用之左右者惟鄧耿數人此皆處之之道也雖然亦在於謹其始焉耳曰丈人曰長子用以行師者得其人及其開國承家自不至於用小人矣聖

人於師之終曰小人勿用政欲其初也專為丈人之用也合前後而觀之聖人之意可見矣



比吉原筮元永貞无咎不寧方來後夫

比親輔也九五以陽剛居上之中而得其正上下五陰比而從之以一人而撫萬邦以四海而仰一人之象故筮者得之則當為人所親輔然必再筮以自審有元善長求貞固之德然後可以當眾之歸而无咎其未比而有所不安者亦將皆來歸之若又遲而後至則此交已固彼來已晚而得凶矣若欲比人則亦以是而反觀之耳○通曰原筮本義讀如原蠶原廟原田之原義皆訓再言筮得此者已為吉道然必再筮

以自審也曰吉曰无咎曰凶皆占辭吉上下相比之吉統言也无咎所比者之占凶比人者之占分言也蒙比卦辭特發兩筮字以示占者之通例筮得蒙卦辭蒙求亨者與亨蒙者皆可用筮得此卦辭為人所比與求比者皆可用碩其所處所存者何如尔易一陽之卦九六復師謙豫比剝也而最吉莫如比盖九五一陽天位而上下皆陰其勢順也周禮九筮三曰筮式筮所以為法式者也故蒙之從師曰筮比之求比比人亦曰筮蒙筮其所以從於師者也比筮其所以比於民者也故王者之比亦曰筮蒙九二在初卦之中故曰初筮比九五在重卦之中故曰原筮蒙之筮問之人者也不一則不專比之筮問其在我者也不再則不審不寧方來指下四陰

而言後夫凶指上一陰而言來者自來後者自後吾惟問我之可比不可比彼之來比不來比吾不問也此固王者大公之道而為九五之顯比者也本義又曰若欲比人者則亦以此而反觀之耳蓋原筮元來貞為比於人者言也本義發出比人者言外之意也

初六有孚比之无咎有孚盈缶終來有他吉

比之初貴乎有信則可以无咎矣若其克實則又有它吉也○通曰與人交止於信親比之初有誠信所以比之无咎及其誠信克實則非特无咎又有他吉也初六不與五應故曰有他大過九四中孚初九皆曰有他皆指非應而言但彼則戒其有它向之心此則許其有它至之吉也○盈缶以四之

比五又下引初之有孚而比之

六二比之自內貞吉

柔順中正上應九五自內比外而得其正吉之道也占者如是則貞而吉矣○通曰上下皆應五而不係私應故謂之比初不係四之應而五應之故曰他四不係初之應而應乎五故曰外惟二本與五應故曰內比之自內而又以正故吉凡卦以下卦為內上卦為外比六二言內六四言外內外卦之分見於此

六三比之匪人

陰柔不中正承乘應皆陰所比非其人之象其占大凶不言可知○通曰三陰柔不中正匪人之象承乘應皆陰所比非

人之象彼固匪人誰實比之比之者三也夫凶可知矣文不言其大凶而夫子於象惻然痛憫之曰不亦傷乎即孟子哀哉意也夫既比之匪人我亦胥為匪人矣彼我既不得謂之人則謂之何哉殊可哀也矣此文畧似蒙六四困之象蒙之所求者九二之一陽也而四胡獨遠之比之所宗者九五之一陽也而三胡獨不比之

六四外比之貞吉

以柔居柔外比九五為得其正吉之道也占者如是則正而吉矣○通曰初六內也九五外也四宜應內者內无可比而比乎外義之與比而无適莫者也是舍柔暗而比剛明得正而吉之道也

九五顯比王用三驅失前禽邑人不誠吉

一陽居尊剛健中正卦之群陰皆來比已顯其比而无私如天子不合圍開一面之網來者不拒去者不追故為用三驅失前禽而邑人不誠之象蓋雖私屬亦喻上意不相警備以求必得也凡此皆吉之道占者如是則吉也○通曰諸陰文皆言比之陰比陽也五言顯比陽為陰所比也比易近於私王者之比大公至正顯然於天下而无私三驅失前禽此成湯祝網孔子弋不射宿之意也若夫邑人則喻王者之心熟矣王者无意於必得故雖邑人亦不相警戒以求必得无私之至也如是則吉師比之五皆取田象師之田有禽害物之禽也比之失前禽皆已之禽也在師則執之王者之義也在

比能失之王者之仁也然使邑人不喻上意或有惟恐失之之心則禽无遺類其仁不廣矣未可以吉言也○彖言審已當衆歸之道九五言當衆歸而顯比之道上獨獲比五則舍之為失前禽邑人不誠象

上六比之无首凶

陰柔居上无以比下凶之道也故为无首之象而其占則凶也○通曰王弼曰乾剛惡首比吉惡後上居九五之後比之不先即卦辭所謂後夫凶者也諸家皆依之惟本義則與後夫凶取義不同盖乾以六爻陽剛盡變而為坤之陰柔故曰无首比以陰柔在上亦曰无首者乾之无首剛而能柔不為首也故吉比之无首陰柔不足為首也故凶或曰卦辭惡其

後爻辭惡其无首義有同否曰其才不足既以高人又不能自卑以下人所以凶也兩義又自相貫



巽上乾下

小畜亨密雲不雨自我西郊

巽亦三畫卦之名一陰伏於二陽之下故其德為巽為入其象為風為木小陰也畜止之之義也上巽下乾以陰畜陽又卦惟六四一陰上下五陽皆為所畜故為小畜又以陰畜陽能係而不能固亦為所畜者小之象內健外巽二五皆陽各居一卦之中而用事有剛而能中其志得行之象故其占當得亨通然畜未極而施未行故有密雲不雨自我西郊之象盖密雲陰物西郊陰方我者文王自我也文王演易於姜里

視岐周為西方正小畜之時也筮者得之則占亦如其象云
○通曰自乾坤而下屯蒙需訟師比皆三男陽卦用事至此
方見巽之一陰用事而以小畜名焉尊陽也陰之畜陽唯能
以巽入柔其剛健非能力制之故陽之亨自若也小過六五
爻辭與小畜彖辭同文王之意謂一陰畜五陽陰有所不及
不能成雨也周公之意謂四陰過乎二陽陽有所不及亦不
能成雨也陰不及不許小者之畜陽不及亦不許小者之過
何也易固為尊陽而作也本義以為文王之事何也下畜上
小畜大文王與紂之事但能用巽柔之道以止畜其惡然終
不能大有所為文王觀象而適有會於心故以其所遭者言
之

初九復自道何其咎吉

下卦乾體本皆在上之物志欲上進而為陰所畜然初九體
乾居下得正前遠於陰雖與四為正應而能自守以正不為
所畜故有進復自道之象占者如是則无咎而吉也○通曰
卦言畜取止之義爻言復取進之義爻與卦不可一例觀也
蓋陽在下而畜於陰勢也其不為所畜而復於上者理也况
初以陽居陽雖與四陰為正應而能自守以正其道復於上
乃當然之理何咎之有其義當吉矣復字雖與復卦之復不
同然復卦唯初與二言吉小畜初與二言復言吉初之復自
道似不遠復二之牽復似休復以其下於初牽復以其連於
初也被則於六陰已極之時喜陽之復生於下此則一陰得

位之時喜陽之復升於上也

九二牽復吉

三陽志同而九二漸近於陰以其剛中故能與初九牽連而復亦吉道也占者如是則吉矣○通曰按本義則初九前遠於陰以剛正能復九二漸近於陰以剛中而能牽復亦吉道也程傳以為二與五相牽本義之說則以為二與五无應二之牽復自係於初五之牽如自係於四

九三與說輻夫妻反目

九三亦欲上進然剛而不中迫近於陰而又非正應但以陽陰相說而為所係畜不能自進故有與說輻之象然以志剛故又不能平而與之爭故又為夫妻反目之象戒占者如是

則不得進而有所爭也○通曰大畜九三曰閑輿衛則利有攸往小畜則曰與說輻何也大畜以艮畜乾小畜以巽畜乾大畜九三與艮一陽同德故其輿利往小畜九三近巽之一陰而為其所制故其輿不可行與說輻陽畜於陰而不得進也夫妻反目陽不平其畜而與之爭也或曰大畜九二輿說輻輿與輻或據左氏傳註以為通用何也曰說文輻車下橫木非輻也大畜九二說輿剛而得中自止而不進也小畜九三說輻剛而不中止於陰而不得進也說輿可復進說輻則不可行矣或曰巽為白眼反目之象

六四有孚血去惕出无咎

以一陰畜衆陽本有傷害憂懼以其柔順得正虛中巽體二

陽助之是有孚而血去惕出之象也。无咎宜矣。故戒占者亦有其德則无咎也。○通曰：三陽健進，四陰畜之，三雖說輻，四亦不能无傷，故曰血。曰惕危之也。必有孚而後血可去，惕可出，乃可无咎戒之也。或曰：九五陽實，曰有孚；六四陰虛，亦曰有孚，何也？曰：中孚二陰居一卦之中，中虛為巽之本，二五陽居上下卦之中，中實為巽之質。小畜四與五皆曰有孚，亦此意也。○六四上乘九五，以有孚而畜之，則下之三陽不能傷之，故血去惕出。

九五有孚，攣如富以其鄰。

巽體三爻同力，畜乾鄰之象也。而九五居中，處尊勢能有為，以兼乎上下，故為有孚。攣，固用富厚之力，而以其鄰之象以

猶春秋以其師之，以言能左右之也。占者有孚，則能如是也。○通曰：攣字與牽字皆有相連之義。初與二皆乾體，故二連初皆欲上進，有牽之象。四與五皆巽體，故五連四上相與，畜在下之三陽，有牽之象。然二與初之占皆吉，五與四上皆无吉，占之辭，聖人言外之意可見也。中孚九五亦言有孚，牽如，蓋言交如者，巽體交也。牽如者，同體合也。○九五下比六四，亦以有孚而固結之，是富能及其鄰也。

上九既雨既處，尚德載。婦貞厲，月幾望，君子征凶。

畜極而成陰，陽和矣，故為既雨既處之象。蓋尊尚陰德，至於積滿而然也。陰加於陽，故雖貞亦厲。然陰既盛而抗陽，則君子亦不可以有行矣。其占如此，為戒深矣。○通曰：此上交也。

而言四者何大畜畜之大故極而散小畜畜之小故極而成
四之畜道成於終故於終爻示戒所謂不可為典要也密雲
不雨為陰言也今既雨矣剛中志行為陽言也今既處而不
行矣尚德載婦貞厲又為陰言月幾望君子征凶又為陽言
蓋陰畜陽至此以成陰雖正亦厲陽有動必凶陰陽兩不利
之象坤六陰欲敵陽極而陰陽兩傷小畜一陰欲畜陽極而
陰陽兩不利為戒深矣。

或曰此文需之變雲上於天變為既雨卦變坎坎為月



乾上

履虎尾不啞人亨

兌亦三畫卦之名一陰見於二陽之上故其德為說其象為

澤履有所躡而進之義也以兌遇乾和說以躡剛強之後有
履虎尾而不見傷之象故其卦為履而占如是也人能如是
則處危而不傷矣○通曰程傳訓履為踐為藉以上下論也
本義曰有所躡而進以前後論也為尾字為切諸家多以兌
為虎本義從程傳以乾為虎本夫子彖傳意也不啞人亨小
畜之亨在乾乾之陽能達於一陰之上也履之亨在兌兌之
陰能安於三陽之下也大抵人之涉世多是危機不為所傷
乃見所履大傳曰易之興也其當文王與紂之事耶是故其
辭危危莫危於履虎尾之辭矣九卦處憂患以履為首然則
以柔巽畜剛惡而不能止小畜之時文王憂患之時也以和
悅履剛強而不見傷履之道其文王處憂患之道欤天下之

理柔能制剛弱能勝強天能破木石而不能穿巒幕以巽畜
乾柔其銳而漸殺其力也以兌履乾剛莫於虎而柔能履之
禮之可尚也如此

初九素履往无咎

以陽在下居履之初未為物迁率其素履者也占者如是則
往而无咎也○通曰初未交於物有素象按本義為蔡氏皆
曰居履之初不為物迁蔡氏則曰素者无文之謂蓋履禮也
履初言素禮以質為本也賁文賁上言白文之極反而質也
白賁无咎其即素履往无咎欵本義只未為物迁一句已含
此意蓋以為質素而未迁可也以為安貧賤之素而未迁亦
可也

九二履道坦坦幽人貞吉

剛中在下无應於上故為履道平坦幽獨守貞之象幽人履
道而遇其占則正而吉矣○通曰六爻為九二所履柔在其
前虛而无礙坦坦之象剛中而上无應幽人守貞之象歸妹
亦下兌二非无應亦曰利幽人之貞何也曰履幽人貞吉以
九二无應而獨善其身所以為幽人之正許之之辭也歸妹
利幽人之貞以九二有應必退處幽間守善於身乃得其正
戒之之辭也然本義謂幽人履道而遇其占則貞而吉看得
道字重盖人所履未有不合道而吉者小畜初九與六四一
陰相應而能復自道所以吉履九二與六三陰相比而自能
履道所以貞吉

六三眇能視跛能履履虎尾咥人凶武人為于大君

六三不中不正柔而志剛以此履乾必見傷害故其象如此而占者凶又為剛武之人得志而肆暴之象如秦攻項藉豈能矣○通曰眇能視跛能履本義以為不中不正柔而志剛之象歸妹初與二分言之行不中則跛歸妹初九但能跛不中也視不正則眇歸妹九二但曰眇不正也易春秋書法美惡不嫌同辭履六三一爻並書之者惡三不中且不正也卦辭以爻為主則爻辭與卦同如屯卦利建侯是也卦之辭以卦上下體論則爻辭與卦不同如此卦曰履虎尾不咥人而六三則書曰咥人是也卦書不咥人兌三文說體自與乾三文健體相應也爻書咥人六三一爻與上九一爻獨相應履

虎尾而首應也六三眇自以為能視跛自以為能履猶武人曾以為能有為於天下者也爻之辭曰履虎尾咥人凶象占具矣又繼以武人為于大君須者兩人字三人位也人而不能免人道之患者必得志而肆暴之武人也其示戒深矣本爻无大君象或疑古人有占得此爻而為大君者故係之或曰六三變成乾故有是象

九四履虎尾愬愬終吉

九四亦以不中不正履九五之剛然以剛居柔故能戒惧而得終吉○通曰三履虎尾四亦言之者承三而言也但本義於三之履虎尾曰不中不正以履乾是以乾為虎而三在其後也於四之履虎尾則曰亦以不中不正履九五之剛是以

九五為虎而四在其後也大抵以兌說視乾剛則乾為虎自乾之三爻視之惟五以剛居剛謂五為虎亦可也然三四皆不中不正而占有不同者三多凶履之三以柔居剛其凶也宜四多惧履之四以剛居柔愬愬然恐惧所以終吉九五夬履貞厲

九五以剛中正履帝位而下以兌說應之凡事必行无所疑礙故其象為夬決其履雖使得正亦危道也故其占為雖正而危為戒深矣○通曰九五履帝位下以兌說應之凡事必行何不可者而聖人猶以夬履為戒蓋處順境愈不可不戒惧也在下者不患其不憂患其不能樂故喜其坦坦在上者不患其不樂患其不能憂故戒其夬坦坦則正而吉許之也

夬則正雖正而危戒之也天澤履與澤天夬上下体相易皆五陽一陰之卦夬決也卦辭曰厲兌辭未嘗有一吉字履九五而欲夬履其厲固宜上九視履考祥其旋元吉

視履之終以考其祥周旋无虧則得元吉占者禍福視其所履而未定也○通曰小畜履上九皆不取本文義小畜取畜之終履取履之終但小畜之終專從六四一陰說來故曰凶履之終統從諸爻說來故曰其旋元吉周旋无虧乃大善而吉也視履之終以考其祥凡事善而或一事之未善一事之中九分善而或一事之未善皆非旋也皆非大善而吉也故本義曰占者禍福視其履履而未定也



泰小往大來吉亨

泰通也為卦天地交而二氣通故為泰正月之卦也小謂陰大謂陽言坤往居外乾來居內又自歸妹來則六往居四九來居三也占者有陽剛之德則吉而亨矣○通曰三陽來而居內三陰往而在外得陰陽之正唯泰卦然自乾坤至履陽三十畫陰三十畫陰陽之數適相等然後為三陰三陽之泰泰豈偶然哉三陰三陽往來之卦凡二十泰否適居其先故卦辭獨以往來言泰以陽為主故本義曰占者有陽剛之德則吉而亨矣吉亨君子之身吉而道亨亦天下之所由以亨者也○本義曰泰正月之卦按辟卦乾四月坤十月本義於

乾坤不言獨自泰正月以下言之何也吾嘗思之而得本義之意矣蓋除乾坤二卦外上經泰否臨觀剝復六卦三十六畫而陰之多於陽者十二下經遯大壯夬姤四卦二十四畫而陽之多於陰者十二又上經自泰正月而臨十二月而復十一月陽月順數已往自否七月而觀八月而剝九月陰月逆推未來下經自遯六月而姤五月陰月順數既往自大壯二月而夬三月陽月逆推方來以上必皆除乾坤然後見其多寡逆順自然之序此本義所以斷自泰正月首言之也至若乾不言四月而言之於下經之始坤不言十月而言之於上經之復蓋先天圓圖剝復之間自有坤後天復次剝剝復又自有坤下坤上此坤十月之卦本義所以不言於坤而言

於復也先天始夫之間自有乾後天始次夫夫始又自有乾下乾上此乾四月之卦本義所以不言於乾而言於始也無他乾坤陰陽之極剝復夫始陰陽消長之際也凡讀本義必如是思之可也

初九拔茅茹以其彙征吉

三陽在下相連而進拔茅連茹之象征行之吉也占者陽剛則其征吉矣郭璞洞林讀至彙字絕句下卦放此○通曰拔茅茹在物為相連而進之象以其彙在人為相連而進之占初曰以其彙君子與君子為類也三陽欲進而以之者在初四曰以其鄰小人與小人為類也三陰欲進而以之者在四四不曰吉初曰征吉易為君子謀也卦言來者謂天氣之下

降爻言征者謂君子之上行卦以氣交自上而下爻以位升自下而上者也

九二包荒用馮河不遐遺朋亡得尚于中行

九二以剛居柔在下之中上有六五之應主乎泰而得中道者也占者能包容荒穢而果斷剛決不遺遐遠而不眩朋比則合乎此爻中行之道矣○通曰陰爻雜有荒穢象包之者二柔虛也用馮河又見九之為剛陰在外有遐遠象不遺之者九剛大也朋亡又見二之為中大槩泰卦陰陽各三爻得陰陽之中五二兩爻又各適陰陽之中只九二一爻亦自有中行之象若有包容而無斷制非剛柔相濟之中也必包容荒穢而又果斷剛決則合乎中矣雖不遺遐遠者而或自私

於吾之黨類則易至偏重非輕重不偏之中矣惟不遺遐遠而又不眩朋比是不忘遠又不泄適合乎中矣本義兩而字當細玩○或曰中行五也尚如尚公主之尚亦通

九三无平不陂无往不復艱貞无咎勿恤其孚于食有福

將過乎中泰將極而否欲來之時也恤憂也孚所期之信也戒占者艱難守貞則无咎而有福○通曰陽居於內為平往而外則為陂陰出於外為往返於內則為復陽之平也已有陂之幾陰之往也已有復之幾况九三將過乎中其陂其復此天運之必至而有孚者也處其交履其會能存艱苦貞固之心不必憂天運之必至則泰之福可長享矣謂泰否之非天不可也不盡人事而一諉諸天亦不可也况自乾坤而後

歷六坎險阻備嘗然後循至于泰而泰第三爻已有否漸焉立身難而失之易創業難而敗之易致治難而亂之易如此哉

六四翩翩不富以其隣不戒以孚

已過乎中泰已極矣故三陰翩然而下復不待富而其類從之不待戒令而信也其占為有小人合交以害正道君子所當戒也陰虛陽實故凡言不富者皆陰爻也○通曰翩翩鳥疾飛下貌群陰來下之象隣三陰相比之象三翩翩然來下不待富而其類從之必來者小人之勢也不待戒令而自相從期於來者小人心也其來也必不利君子之貞矣三將過乎中且以艱貞為君子戒四已過乎中君子所當戒固不

待言也

六五帝乙歸妹以祉元吉

以陰居尊為泰之主柔中虛已下應九二吉之道也而帝乙歸妹之時亦嘗占得此文占者如是則有祉而元吉矣凡經以古人為言如高宗箕子之類者皆倣此○通曰歸妹上交下陰交陽之象三曰福五曰祉福祉自天皆乾之象本義曰泰自歸妹卦來或曰歸妹二体正兌本震震泰互体亦然歸妹人之終始取其交也二言尚五言歸取上下之交也按京房載湯歸妹之辭曰无以天子之尊而乘諸侯无以天子之富而驕諸侯陰之從陽女之順夫本天地之義也往事爾夫必以禮義然則五之從二能如此則有祉而元吉矣

上六城復于隍勿用師自邑告命貞吝

泰極而否城復于隍之象戒占者不可力争但可自守雖得其貞亦不免於羞吝也○通曰城隍邑皆坤土象九三將過乎泰之中艱貞猶可无咎上六泰極而否不可用師以力争僅可告邑以自守雖貞亦不免於吝矣蓋以陰柔處泰之終故不能保泰而泰復為否以陽剛處否之終故卒能傾否而否復為泰否泰反覆天乎人也



坤上 乾下

否之匪人不利君子貞大往小來

否閉塞也七月之卦也正與泰反故曰匪人謂非人道也其占不利於君子之正道乾往居外坤來居內又自漸卦而

來則九往居四六來居三也或疑之匪人三字衍文由比六三而誤也傳不特解其義亦可見○通曰泰曰小往大來而後曰吉亨先象後占否曰不利君子貞而後曰大往小來先占後象否與泰卦爻之辭每每相反本義云否與泰反故曰匪人謂非人道也推之則天地陰陽不交生道絕矣匪人也入一身陽上克而陰下滯元氣竭矣匪人也人之一心人欲為主於內天理緣飾於外失其所以為人矣匪人也其占曰不利君子貞者匪人用事之時也匪人用事不曰利不貞而曰不利君子貞易為君子謀不為小人謀也泰否之占皆為君子設

初六拔茅茹以其彙貞吉亨

三陰在下當否之時小人連類而進之象而初之惡則未形也故戒其貞則吉而亨蓋能如是則變而為君子矣○通曰否初六小人也亦如泰初以茅為象蓋二與三之惡已形故曰包承曰包羞以形容小人之情狀初惡未形以茅為象見其亦可為君子也泰初九得正否初不正故泰不曰貞而否曰貞泰初可往否初不可往故泰有征而否无征

六二包承小人吉大人否亨

陰柔而中正小人而能包容承順乎君子之象小人之吉道也故占者小人如是則吉大人則當安守其否而後道亨蓋不可以彼包承於我而自失其守也○通曰初之惡未形故不稱曰小人至六二則直以小人稱矣泰卦辭曰吉亨否初

爻辭亦曰吉亨否之初猶可變而為泰也二曰小人吉大人否亨於是乎成否矣曰大人否亨者見得否者君子之事小人固無所謂否也小人能包容承順乎君子小人之吉也大人不以其包承於我而自失其守大人之身雖否大人之道固亨也

六三包羞

以陰居陽而不中正小人志於傷善而未能也故為包羞之象然以其未發故无凶咎之戒○通曰二與三皆陰柔陰故皆有包含之象六二陰柔中正其所蘊欲承順君子六三陰柔而不中正所蘊者直欲傷君子而未能耳故有包羞之象占不曰凶咎者或謂包羞而未發也倘其自以為可羞則亦

羞耻之心義之端也故不自凶咎或曰恒九三或承之羞如何曰或承之羞則可耻者方蘊於內故於彼曰貞吝此則不曰貞凶猶莫其或可為君子也

九四有命无咎疇離祉

否過中矣將濟之時也九四以陽居陰不極其剛故其占為有命无咎而疇類三陽皆獲其福也命謂天命○通曰諸解皆以命為君命本義以為天命蓋泰九三无平不陂无往不復否九四有命否泰之變皆天也然泰變為否易故於內卦即言之否變為泰難故於外卦始言之此本義於泰否之四皆曰已過乎中泰之三曰將過乎中而否之三不言也泰之三必无咎而後有福否之四必无咎而後疇離祉三四乾坤接

之處陰陽往來之會君子當此必自无咎而後可為福而後
可為疇類之福○或曰否九四之時吉凶未判必有命方得
无咎其所謂无咎者天也非人也曰本義云九四以陽居陰
不極其剛故其占為有命无咎蓋惟四不極其剛所以為四
之无咎也一諉諸天可乎哉

九五休否大人吉其亡其亡繫于包桑

陽剛中正以居尊位能休時之否大人之事也故此爻之占
大人遇之則吉然又當戒懼如繫辭傳所云也○通曰二五
皆以大人言蓋以大人而處六二之時有德无位當守其否
而後道亨以大人而居九五之位則有德有位能休時之否
矣然則九五休否之大人即六二所謂否亨之大人也前日

不能處否而亨今日其能休天下之否乎然謂之休否否雖
暫息猶未盡傾也九五大入當休否之初即有戒懼危亡之
心則是否之方休已有苞桑繫固之象矣其卒能傾否而為
泰也固宜

上九傾否先否後喜

以陽剛居否極能傾時之否者也故其占為先否後喜○通
曰九四有命是否已過中將濟之時九五休否是否方休息
可濟之時上九傾否則如水之傾否於此盡矣先否後喜此
喜字又自其亡其亡戒懼中來

☰☷ 離上 乾下

同人于野亨利涉大川利君子貞

離亦三畫卦之名一陰麗於二陽之間故其德為麗為文明其象為火為日為電同人與人同也以離遇乾火上同於天六二得位得中而上應九五又卦惟一陰而五陽同與之故為同人于野謂曠遠而无私也有亨道矣以健而行故能涉川為卦內文明而外剛健六二中正而有應則君子之道也占者能如是則亨而又可涉險然必其所同合於君子之道乃為利也○通曰坎離皆乾坤之用易至此十二卦坎體凡六見離體於此始見焉需訟小畜履四卦互離至同人大有而見離體凡六離之用與坎等矣同人大有皆主離之一陰而言離一陰在二而上下五陽同與之故曰同人離一陰在五而上下五陽皆為所有五君位而群陽之宗上下順從故

爻多吉辭而彖但曰元亨二臣位而為群陽之宗易失之私故爻多戒辭而彖曰亨曰利君子貞或曰君子周而不比和而不同而卦名曰比曰同何哉比者一陽為衆陰所比而坎陽居五為得其正故曰元永貞是其比也即所以為君子之月同人一陰為衆陽所同而離陰居二為得其正故曰利君子貞是其同也即所以為君子之和同人于野其同也大利君子貞其同也正與人大同亨道也雖大川可涉然有所同者大而不出於正者故又當以正為本

初九同人于門无咎

同人之初未有私主以剛在下上无係應可以无咎故其象占如此○通曰同人與隨初九皆前遇六二偶有門象同人

與隨皆易溺於私隨必出門而後可以有功同人必出門而後可以无咎蓋易以人名卦者有二卦名家人一家之人也卦名同人天下之人也門以內所同者一家之人而已六二同人于宗是也出門同人所同者一國之人也天下之人也卦辭同人于野是也

六二同人于宗吝

宗黨也六二雖中且正然有應於上不能大同而係於私吝之道也故其象占如此○通曰二往同五復成離五來同二復成乾往來相同乾離各反其本是之謂宗又禮云別子為祖繼別為宗繼祚者為小宗同人于宗似不失其為六二之正也較之于野之同則亦係於私矣初九出門无所係故无

咎六二于宗有所係故吝

我于莽欲攻二似有畏五意升其高陵離畏五又有顧望意五終不

九三伏戎于莽升其高陵三歲不興

剛而不中上无正應欲同於二而非其正惧九五之見攻故有此象○通曰二與五同者也九三欲攘二而畏五伏與升備見三之情狀伏可敵也是以三歲不興卦惟三四不言同人二與五相同而三四有爭奪之象非同者也

九四乘其墉弗克攻吉

剛不中正又无應與亦欲同於六二而為三所隔故為乘墉以攻之象然以剛居柔故有自反而不克攻之象占者如是則是能改過而得吉也○通曰四欲攻二而三隔之有墉象四在三之上有乘墉象係辭曰愛惡相攻而利害生遠近相

取而悔吝生三四皆欲取六二三雖以剛居剛猶懼五之見
攻屈於勢而不可敵也四以剛居柔欲乘墉以攻終不克攻
者是能屈於義而不敢敵也春秋文公十年書晉人納捷菑
于邾弗克納有得於周公爻辭弗克攻之旨矣穀梁傳曰弗
克納其義也有得於夫子象傳義弗克之旨矣諸家多以三
四為欲攻五於理悖甚惟本義得之

九五同人先號咷而後笑大師克相遇

五剛中正二以柔中正相應於下同心者也而為三四所隔
不得其同然義理所同物不得而間之故有此象然六二柔
弱而三四剛強故必用大師以勝之然後得相遇也○通曰
二五剛柔相應而皆合乎中正本義所謂義理之同也程傳

謂五自以義直理勝不勝悒憤故號咷邪不勝正終必得合
故後笑春秋書鄭伯克段于鄆傳曰如二君故曰克五之於
三四也必用大師克之而始與二遇三四之非理而強可見
矣或曰旅人先笑後號咷何也曰同人九五剛中正而有應
于六二故先號咷而後笑旅上九剛不中正而无應于九三
故先笑後號咷

上九同人于郊无悔

居外无應物莫與同然亦可以无悔故其象占如此郊在野
之外未至於曠遠但荒僻无與同耳○通曰野則曠遠无人
不同郊則荒僻无人與同初上皆无應初出門同人出乎家
之外而同乎國之人也在下而无私應者也上九不同乎國

唐虞有義通經
之人乃出乎國之外是荒僻无人之所在外而无應者如荷
蕢之徒是也故不謂之凶但謂之无悔

三三離乾下
離上

大有元亨

大有所有之大也離居乾上火在天上无所不照又六五一
陰居尊得中而五陽應之故為大有乾健離明居尊應天有
亨之道占者有其德則大善而亨也○通曰卦名大者皆指
陽而言此卦五陽愈足以見其大或曰小畜亦五陽一陰之
卦主巽之一陰則曰小此主離之一陰則曰大何也曰巽之
一陰在四欲畜上下五陽其勢逆而難離之一陰在五而有
上下五陽其勢順而易卦因四五之交而有大小之分君人

者之大分明矣故小畜之亨不在六四而在上下五陽大有
之元亨不但在上下五陽而在六五

初九无交害匪咎艱則无咎

雖當大有之時然以陽居下上无所係應而在事初未涉乎
害者何咎之有然亦必艱以處之則无咎戒占者宜如是
也○通曰諸家多以无交害為无上下之交所以无害本義
從程子之說謂居下无係應而未涉乎害盖无係應三字已
自見无上下之交矣富者怨之府故當大有之時反易有害
初陽在下未與物接所以未涉於害也何咎之有然以為匪
咎而以易心處之反有咎矣无交害大有之初如此艱則无
咎大有自初至終皆當如此

九二大車以載有攸往无咎

剛中在下得應乎上為大車以載之象有所往而如是可
无咎矣占者必有此德乃應其占也○通曰坤為大輿九二
乾体而曰大車者輿指軫之方而能載者言車則以其全体
而言引之以馬之健行之以輪之圜皆乾象也况九二以剛
居柔柔則其虛足以受剛則其健足以行有大車象得應乎
五載上之象有所往而如是可无咎矣不曰吉者大臣任
天下之重職當如此也僅得无咎處大有之難如此

九三公用亨於天子小人弗克

亨春秋傳作享謂朝獻也古者亨通之享享獻之享烹飪之
烹皆作亨字九三居下之上公侯之象剛而得正上有六五

之君虛中下賢故為亨于天子之象占者有其德則其古如
是小人无剛正之德則雖得此爻不能當也○通曰九二宰
相任重之事九三諸侯朝獻之事皆不言吉皆臣職之所當
然者然亨之有朝享之享有宴享之享本義惟訓享為朝獻
又曰六五虛中下賢則又兼宴享之義矣享禮之盛者必如
九三有剛正之德能當之在小人則有不共包茅不脩朝貢
者矣安足以當此

九四匪其彭无咎

彭字音義未詳程傳曰盛貌理或當然六五柔中之君九四
以剛近之有僭逼之嫌然以其處柔也故有不極其盛之象
而得无咎戒占者宜如是也○通曰卦名大有彭字則大字

之義大有皆六五之有也六五在上而九四以剝近之有借逼之嫌必不有其大而後可以无咎

六五厥孚交如威如吉

大有之世柔順而中以處尊位虛已以應九二之賢而上下歸之是其孚信之交也然君道貴剛太柔則廢當以威濟之則吉故其象占如此亦戒辭也○通曰家人上九亦曰有孚威如終吉家人之上陽也威其所固有也大有之五陰也疑不足於威也故本義以是為戒辭孚所以通上下之情威所以嚴上下之分情不通則離分不嚴則褻故孚本離之虛而威則欲其濟以乾之健上九自天祐之吉无不利

大有之世以剝居上而能下從六五是能履信思順而尚賢也滿而不溢故其占如此○通曰小畜上九畜之終也其占曰厲曰凶為六四言也大有上九有之終也其占吉无不利為六五言也小畜一陰在四欲畜眾陽而其終也如此大有一陰在五能有眾陽而其終也乃如此君臣之大分可不明哉蓋五之厥孚履信也柔中思順也尚上九之一陽尚賢也所以其終也自天祐之吉无不利也本義於大畜尚賢曰六五能尊上九之賢所恨者不得親承先師而質此疑耳○上居君上天也

三三艮下

謙亨君子有終

周易本義通釋

謙者有而不居之義止乎內而順乎外謙之意也山至高而地至卑乃屈而止於其下謙之象也占者如是則亨通而有終矣有終謂先屈而後伸也○通曰君子三也周公文辭於乾九三稱君子蓋本諸此乾為第一卦本義謂筮得乾卦者其事雖大亨猶未易以保其終蓋天下事始之亨者十九亨而有終者十一惟謙則於德為君子於事為亨為有終亦惟文王能盡之履者謙之對文王九卦以履謙為首履以兌一陰躡乎乾三陽之後履之為禮也謙以艮一陽抑於坤三陰之下謙之所以制禮也陰為小說而應乾安其為小也所以履繼小畜之後陽為大勞而能謙忘其為大也所以謙繼大有之後小則安大則忘文王處憂患之道其在茲乎以是處

變所以免咥人之凶以是守常所以能成謙亨之終三危地也文王處危而亨固自有道也

初六謙謙君子用涉大川吉

以柔處下謙之至也君子之行也以此涉難何往不濟故占者如是則利以涉川也○通曰謙主九三故三爻辭與卦辭皆稱君子有終初亦曰君子何也三在下卦之上勞而能謙在上之君子也初在下卦之下謙而又謙在下之君子也在上者尊而光在下者卑而不可踰皆所以為君子之終也用涉大川吉雖用以濟患可也况平居乎

六二鳴謙貞吉

柔順中正以謙有聞正而且吉者也故其占如此○通曰諸

家釋鳴謙多謂自鳴其謙謙而自鳴非謙矣或以為六二謙德積於中所以發見於聲音者如此本義以為六二柔順中正以謙有聞蓋謂發於聲音不若謙而有聲有非可勉強為之者要之初六謙謙似乾初九潛龍在下而潛人所不見也至九二則人皆見之矣在下而謙謙人未必皆聞之也至六二則聞之矣

九三勞謙君子有終吉

卦唯一陽居下之上剛而能正上下所歸有功劳而能謙尤人所難故有終則吉占者如是則得其應矣○通曰卦所主在三文王卦辭曰謙亨君子有終周公於三之爻辭以吉代亨字謙之上加一勞字蓋謙非難勞而謙為難九三之勞當

在上而止於下所謂勞而能謙者也乾之三以君子稱坤之三以有終言謙之三兼乾坤占辭勞則乾之終日乾乾謙則坤之含章也

六四无不利撝謙

柔而得正上而能下其占无不利矣然居九三之上故戒以更當發揮其謙以示不敢自安之意也○通曰四多惧之地下乘功臣非利也上近君非利也今而上下皆謙四又柔而得正上而能下此四之所以无不利也无不利之時人每易以自安况四以柔乘剛无功而在功臣之上危地也愈當撝布其謙以示其不自安之意可也故先言无不利而後言撝謙者以其所處之地雖无不利而尤貴於散布其謙也六五

言利用侵伐而後言无不利者言侵伐者五之柄於五為最利而其它亦无所不利也

六五不富以其隣利用侵伐无不利

以柔居尊在上而能謙者也故為不富而能以其隣之象蓋從之者眾矣猶有未服者則利以征之而於他事亦无不利人有是德則如是占也○通曰謙之一字自禹征有苗而伯益發之六五一爻不言謙而曰利用侵伐何也蓋不富者六五虛中而能謙也以其隣者眾莫不服五之謙也如此而猶有不服者則征之固宜抑亦以戒夫謙柔之過或不能自立者也故六五獨不言謙无不利者又言謙非特利於侵伐而它事亦无不利又以示夫後世之主或不能謙者也聖人之

言詳密如此

上六鳴謙利用行師征邑國

謙極有聞人之所與故可用行師然以其質柔而无位故可以征己之邑國而已○通曰二與上皆言鳴謙何也有諸中者自然聞諸外故於下卦之中爻言之凡善惡不能掩人之聞况至於極乎故又於上卦之極言之本義於六二之鳴謙曰柔順中正以謙有聞蓋謂此也初曰用涉大川吉五曰利用侵伐上曰利用行師歷言夫謙之功用非特可以處常用之亦可以濟變非特可以致萬民之服用之亦可以征不服故初雖无位其謙也用之可以濟人五居君位其謙也用之可以治人上无位用之惟可以治己之私而已夫初上皆无

位而上之征邑不如初之涉川何也初居卦之始有出而用之之時上則居卦之極故也下三爻吉謙而正也上三爻利謙而順也

三三坤下

三三震上

豫利建侯行師

豫和樂也人心和樂以應其上也九四一陽上下應之其志得行又以坤遇震為順以動故其卦為豫而其占利以立君用師也○通曰建侯震象行師坤象屯有震无坤故不言行師師有坤无震故不言建侯且一陽止於五陰之中為謙一陽動於五陰之中為豫比之建侯師之行師皆以一陽統五陰而豫在師比之間故建侯行師兼焉建萬國聚大眾非順

理而動使人心皆和樂而從不可也故二者皆係之豫初六鳴豫凶

陰柔小人上有強援得時主事故不勝其豫而以自鳴凶之道也故其占如此卦之得名本為和樂然卦辭為眾樂之義爻辭除九四與卦同外皆為自樂所以有吉凶之異○通曰爻辭與卦辭不同者三卦辭取同樂之義爻辭除九四外為獨樂卦辭只一豫字而爻之言豫者不同初六上六逆豫也六二幾先之豫也六三之遲猶豫也九四和豫也六五之疾弗豫也卦辭主九四曰剴應而志行是以德言爻辭則諸爻於九四以勢位言六三以其有勢位之可慕故上之以為豫初六以其勢位可以為強援故應之以為豫且不勝其豫而

以自鳴凶之道也或曰豫與謙反對謙之上反而為豫之初者也本義於上之鳴謙則曰謙極有聞於初之鳴豫不曰有聞而曰自鳴均之為鳴也何其訓釋之異耶曰謙之極而有聞善不能不聞也豫之初而以豫自鳴志已極矣其惡之有聞不言可知也

六二介於石不終日貞吉

豫雖主樂然易以溺人溺則反而憂矣卦獨此爻中而得正是上下皆溺於豫而獨能以中正自守其介如石也其德安靜而堅確故其思慮明審不俟終日而見凡事之幾微也大

學曰安而后能慮慮而后能得意正如此占者如是則正而吉矣○通曰諸爻皆溺於豫者惟二五不言豫六五貞疾不為疾六二不係於四介乎初與三之間如石之不相入獨以中正自守其堅確如石故豫最易以溺人而六二則不俟終日而去之其德安靜而堅確故能見幾而作如此不為逸豫之豫而知有先事之豫者也

六三盱豫悔遲有悔

盱上視也陰不中正而近於四四為卦主故六三上視於四而下溺於豫宜有悔者也故其象如此而其占為事當速悔若悔之遲則必有悔矣○通曰本義於二曰中而得正於三曰陰不中正故盱豫與介于石相反遲與不終日相反中正與不中正故也六三雖陰其位則陽猶有能悔意然悔之速

可也悔之遲則必有悔矣此蓋溺於豫而悔之遲則又猶豫也

九四由豫大有得勿疑朋盍簪

九四卦之所由以為豫者也故其象如此而其占為大有得然又當至誠不疑則朋類合而從之矣故又因以戒之簪聚也又速也○通曰願以陽居上衆陰由之以養故曰由願豫以陽居四衆陰由之以豫故曰由豫由如觀其所由之由豫之所從來也豫九四一陽而衆陰皆為其所得故其象曰由豫其占曰大有得然九四以陽居陰性易有疑乾九四或躍疑其所當疑故曰或之者疑之許之之辭也豫九四不當疑而疑故曰勿疑戒之之辭也我至誠不疑則一誠之感衆陰

自朋聚而從之或曰簪速也不疑則朋之從者自速也此和豫之豫也

六五貞疾恒不死

當豫之時以柔居尊沉溺於豫又乘九四之剛衆不附而處勢危故為貞疾之象然以其得中故又為恒不死之象即象而觀占在其中矣○通曰願之由在上九故六五不可涉大川豫之由在九四故六五貞疾易之言疾者四曰无妄之疾勿藥有喜曰損其疾使適有喜曰介疾有喜皆言疾之愈而可喜此言貞疾僅得不死耳未可喜也豫最易以溺人六二柔中且正能不終日而去之六五陰柔不正未免溺於豫而有疾矣猶得不死者中未亡也人莫不生於憂患而死於逸樂

以六五之中僅得不死然則初之鳴三之盱上之冥其不中者皆非生道矣

上六冥豫成有渝无咎

以陰柔居豫極為昏冥於豫之象以其動体故又為其事雖成而能有渝之象戒占者能如是則能補過而无咎所以廣遷善之門也○通曰冥豫與冥升迷復同義聖人不言冥豫之凶而言成有渝之无咎廣遷善之門也事已成而能變猶无可咎未成而變可知矣初鳴豫即斷之以凶甚於初者所以過其惡也上冥豫則開之以无咎恕於終者所以開其善也或曰豫上六變則為晉晉明出地上非冥矣

三三震下兌上

隨元亨利貞无咎

隨從也以卦變言之本自困卦九來居初又自噬嗑九來居五而自未濟來者兼此二變皆剛來隨柔之義以二体言之為此動而彼說亦隨之義故為隨已能隨物物來隨已彼此相從其通易矣故其占為元亨然必利於貞乃得无咎若所隨不貞則雖大亨而不免於有咎矣春秋傳穆姜曰有是四德隨而无咎我皆无之豈隨也哉今按四德雖非本義然其下云云深得占法之意○通曰屯臨无妄革皆言元亨利貞不言无咎惟隨則以无咎繼之蓋我隨人或為人所隨其事雖大亨非正固易有咎也况動而說易失於不正其何能无咎不正則隨中有事而蠱患生矣作易者繼以无咎有深意

焉

初九官有渝貞吉出門交有功

卦以物隨為義爻以隨物為義初九以陽居下為震之主卦之所以為隨者也既有所隨則有所偏主而變其常矣惟得其正則吉又當出門以交不私其隨則有功也故其象占如此亦因以戒之○通曰无妄內震故曰主此條內震故曰官初為動之主有官守者也九剛能守官者也官本在上之物今來居於初官之有渝者也官守者不可渝今陽得陽位渝而正矣故吉然必出門以交方為有功否則所隨或昵於私非惟无功且有過本義因以戒之者此也或曰隨下震震為郊故初九有出門象節下兌兌為酉故九二有不出門之象

六二係小子失丈夫

初陽在下而近五陽正應而遠二陰柔不能自守以須正應故其象如此凶吝可知不假言矣○通曰六柔有係象小子初陽在下象丈夫五陽在上象隨六爻陰陽各半陰有所隨无所係故初與五皆吉四何咎陰性隨而不能无所係故二係小子三係丈夫上拘係之皆不言吉然係丈夫猶可也係小子凶咎不言可知六二以初陽在近而係之則五陽雖正應必失之矣

六三係丈夫失小子隨有求得利居貞

丈夫謂九四小子亦謂初也三近係四而失於初其象與六二正相反四陽當任而已隨之有求必得然非正應故有不

正而為邪媚之嫌故其占如此而又戒以居貞也○通曰本義與程傳皆以初為小子易之例不問陰陽小子皆指初而言漸初六陰亦稱小子也事有得必有失失於此必得於彼六二失丈夫失其所不可失也故不言得六三失小子而言有求得失其所當失也失即是得瘡以潰為得病以去為得六三之失乃所以為得也利居貞有三義初九陽居陽貞也故言貞吉六三陰居陽不正故戒之曰利居貞而不言吉三係丈夫固異於二之係小子然四非正應又有所係而隨已非正大之情故不言吉而戒以居貞或曰士之病莫大於有所求三之於四不可以有求必得而妄有不正之求也故戒之

九四隨有獲貞凶有孚在道以明何咎

九四以剛居上之下與五同德故其占隨而有獲然勢凌於五故雖真而凶唯有孚在道而明則上安而下從之可以无咎也占者當時之任宜審此戒○通曰六三隨有求得隨人而有得也九四隨有獲以得人之隨為獲也然豫九四大有得不言凶隨九四有獲而言貞凶何也豫九四以一陽得五陰卦之所以為豫者在四若夫卦之所以為隨者不在四而在初四下不與初應而上又勢凌於五未必上安而下從之也雖貞亦凶况不貞乎有孚在道以明戒之深矣非孚非道非明凶咎必矣

九五孚于嘉吉

陽剝中正下應中正是信于善也占者如是其吉宜矣○通
曰四五以陽居三上二陰之中陽內陰外有中實之象故皆
曰孚四之孚戒之之辭也欲其孚乎五也五之孚許之之辭
五陽剝中正而下應二之中正孚于二之善者也其吉固宜
上六拘係之乃從維之王用亨于西山

居隨之極隨之固結而不可解者也誠意之極可通神明故
其占為王用亨于西山亨亦當作祭享之享自周而言岐山
在西凡筮祭山川者得之其誠意如是則吉矣○通曰西兌
象山互艮象兌為西西陰方有祭而固結於陰幽之象拘係
之所以象隨之極固結而不可解者也至誠之極可以固結
神明而况於人乎故曰王用亨于西山周視岐山為西意者

六柔有係象居柔又有拘係象

大王之在岐其祭山川必嘗占得此歟

三三

巽下
艮上

蠱元亨利涉大川先甲三日後甲三日

蠱壞極而有事也其卦艮剝居上巽柔居下上下不交下卑
巽而上苟止故其卦為蠱或曰剛上柔下謂卦變自賁來者
初上二下自井來者五上上下下自既濟來者兼之亦剝上而
柔下皆所以為蠱也蠱壞之極亂當復治故其占為元亨而
利涉大川甲日之始事之端也先甲三日辛也後甲三日丁
也前事過中而將壞則可自新以為後事之端而不使至於
大壞後事方始而尚新然更當致其丁寧之意以監其前事
之失而不使至於速壞聖人之戒深矣○通曰蠱雖壞極必

有大通之時故其占為元亨為利涉大川或曰以釋彖推之諸卦釋利涉大川曰往有功此曰往有事蓋有意拯濟艱險之意先甲後甲之說不一愚以為蠱由巽艮而成當從艮巽看先天甲在東之離由甲之數離震坤三位得艮先甲三日也自甲順數離兌乾三位得巽後甲三日也然則上艮止下卑巽所以為蠱於艮得先甲三日之辛於巽得後甲三日之丁又以治蠱也先庚後庚則取後天艮巽之義見巽九五爻辭

初六幹父之蠱有子考无咎厲終吉

幹如木之幹枝葉之所附而立者也蠱者前人已壞之緒故諸爻皆有父母之象子能幹之則飭治而振起矣初六蠱未

深而事易濟故其占為有子則能治蠱而考得无咎然亦危矣戒占者宜如是又知危而能戒則終吉也○通曰爻辭有以時位言者有以才質言者如蠱初六以陰在下所應又柔才不足以治蠱以時觀之則於蠱為初蠱猶未深事猶易濟故其占為有子則其考可无咎矣然謂之蠱則已危厲不可以蠱未深而忽之也故又戒占者知危而能戒則終吉九二幹母之蠱不可貞

九二剛中上應六五子幹母蠱而得中之象以剛承柔而治其壞故又戒以不可堅貞言當巽以入之也○通曰五柔居尊位有母象晉六二王母亦謂五也二在內處中而與五應有幹事之象又家之壞或由婦人而其子才能飭之亦幹母

蠱也貞者事之幹九二幹蠱而戒之曰不可貞幹母之蠱也非不可正也不可固執以為正也母性多柔暗以二之剛承五之柔巽以入之不固守其剛乃中道也固則反傷息害義矣

九三幹父之蠱小有悔无大咎

過剛不中故有小悔巽体得正故无大咎○通曰幹蠱之道以剛柔相濟為尚初六六五柔而居剛九二剛而居柔皆可幹蠱不然與其為六四之過於柔而吝不若九三之過於剛而悔悔自凶而吉吝自吉而凶故曰小有悔若不足其過於剛繼之曰无大咎猶幸其能剛也幸其能体巽之權而不失其正也作易者論子之幹蠱而寄之於巽三爻有深意焉

六四裕父之蠱往見吝

以陰居陰不能為寬裕以治蠱之象也如是則蠱將日深故往則見吝戒占者不可如是也○通曰六四爻位俱陰柔而无應故曰裕以時言之初六蠱猶未深故但有子則考可以无咎四之時非初比也而復寬裕以視之蠱將日深矣以斯而往其見吝也固宜

六五幹父之蠱用譽

柔中居尊而九二承之以德以此幹蠱可致聞譽故其象占如此○通曰六五君位而亦曰幹父之蠱者雖天子必有父也五為繼世之君有九二承之以德是能任賢以致聞譽者也諸家或以為用九二令譽之臣近於以名用人不若謂任

九二之德自可成六五之名也
上九不事王侯高尚其事

剛陽居上在事之外故為此象而占與戒皆在其中矣○通
曰初至五皆以蠱言不言君臣而言父子臣於君事猶子於
父事也上九獨以不事王侯言君臣以義合子於父母有不
可自諉於事之外者若主侯之事君子有不可事者矣是故君
子之出處在事之中盡力以幹焉而不為汚在事之外潔身
以退焉而不為僻本義謂為此象而占與戒皆在其中蓋以
時當高尚或自禱於卑下亦當戒也

三三兌下
坤上

臨元亨利貞至于八月有凶

臨進而凌逼於物也二陽浸長以逼於陰故為臨十二月之
卦也又其為卦下兌說上坤順九二以剛居中上應六五故
占者大亨而利於貞然至于八月當有凶也八月謂自復卦
一陽之月至于遯卦二陰之月陰長陽遯之時也或曰八月
謂夏正八月於卦為觀亦臨之反對也又因占而戒之○通
曰本義解臨字諸家之所未發如履訓踐只見上履下不見
下柔履剛之意本意依履帝武敏之履謂有躡而進之意蓋
以兌柔而躡乾剛之後也臨字訓近訓大只見上臨也亦不
見剛臨柔之意本義依如臨深淵之臨謂進而逼於淵此所
謂臨者剛進而逼於柔也蓋謂之復者七日来復陰之極而
陽初來也謂之臨者朋来无咎二陽皆来而逼於陰也復亨而

臨大亨復不言利貞臨言利貞復是初陽之萌无有不善臨則二陽浸盛易至放肆故戒之曰利貞或曰此臨也而已惧其為遯何也遯去也剛浸而長君子之朋來可喜陰浸而長君子之易去也可憂長有消之幾來有去之幾不可不戒也陽至二未過中即為之戒戒貴乎早也若論反對則觀為八月聖人於觀不言陰之盛而於臨言之為君子謀也要之八月有三說觀八月一說也歷臨六位又至遯初二二陰九八位八於數為陰於象為月歷剝六爻至復初一陽凡七位七於數為陽於象為日又一說也復下震震少陽七於東為日出之方臨下兌兌少陰八於西為月出之方又一說也

初九咸臨貞吉

卦唯二陽徧臨四陰故二爻皆有咸臨之象初九剛而得正故其占為貞吉○通曰復曰朋來初二兩咸字即朋字之義兩臨字即來字之義故復初元吉臨初亦貞吉

九二咸臨吉无不利

剛得中而勢上進故其占吉而无不利也○通曰初剝得正未見其勢之進故曰貞吉二剝得中勢可以上進故不特曰吉又曰无不利至六三則曰无攸利扶陽抑陰之意可見矣六三其臨无攸利既憂之无咎

陰柔不中正而居下之上為以其說臨人之象其占固无所利然能憂而改之則无咎也勉人迁善為教深矣○通曰彖唯取剛臨柔爻則初二外皆上臨下三兌体在二陽之上為

以耳說臨人之象節九五以中正為耳則吉此以不中正為耳故无攸利憂者說之反能憂而改則无咎矣六三變則為泰三能改而自新則既憂之无咎即泰之艱貞无咎也彖以八月有凶警君子文以既憂之无咎戒小人易於君子小人之際用意深矣哉

六四至臨无咎

處得其位下應初九相臨之至宜无咎者也○通曰六四以陰居陰處得其正下應初九之正相臨之至所以无咎又地附澤澤依地六四坤兌之間地與澤相臨之至者也

六五知臨大君之宜吉

以柔居中下應九二不自用而任人乃知之事而大君之宜吉之道也○通曰六五自是柔暗之主何為以知稱蓋謂之臨多是以已臨人五虛中下應九二不任已而任人所以為知所以為大君之宜中庸曰聰明睿智足以有臨又曰舜其大知也與舜好問而好察邇言其皆出於此歟周公文辭獨於臨之坤體曰知臨夫子釋四德言仁義禮不言知知光大言於坤五常之德知藏於內坤以藏之故也○六五下應九二之剛自非大知之君不能下賢故吉

上六敦臨吉无咎

居卦之上處臨之終敦厚於臨吉而无咎之道也故其象占如此○通曰坤與艮皆土也皆有敦厚之象然皆於終見之復除上六迷復外六五為復之終曰敦復艮上九艮之終曰

敦艮吉此曰敦臨相與而厚於終者也故吉且无咎○上六去二陽甚遠而有下臨之志

三三坤下巽上

觀盥而不薦有孚顒若

觀者有以中正示人而為人所仰也九五居上四陰仰之又內順外巽而九五以中正示天下所以為觀盥將祭而潔手也薦奉酒食以祭也顒然尊敬之貌言致其潔清而不輕自用則其孚信在中而顒然可仰戒占者當如是也或曰有孚顒若在^言下之人信而仰之也此卦四陰長而二陽消正為八月之卦而名卦繫辭更取它義亦扶陽抑陰之意○通曰盥潔手也巽潔齊象諸家謂盥者祭之始盥手酌鬱鬯於地以

求神之時也本義但以為將祭而盥手蓋酌鬱鬯以降神灌也非盥也諸家謂薦則誠意已散不復如盥之時本義之意則謂盥豈有不薦者孝子之禱豈有皆至薦而誠散者獨就觀示上發盥而不薦之義以喻二陽在上无為而化蓋祭必先盥登者未用事之時薦則祭而用事矣聖人至德之化如將祭而盥不待見於用事孚信在中已顒然可仰觀之者見其盥未見其薦已信而仰之蓋不待觀其行事而化也不薦而孚蓋與未占有孚畧同也夫觀四陰二陽八月之卦四陽名曰大壯以陽之盛言也四陰豈不可以陰之盛言而卦名謂之觀取二陽在上為四陰所仰且就觀字上發出示民神化之妙扶陽抑陰之意深矣

初六童觀小人无咎君子吝

卦以觀示為義據九五為主也爻以觀瞻為義皆觀乎九五也初六陰柔在下不能遠見童觀之象小人之道君子之羞也故其占在小人則无咎君子得之則可羞也○通曰童之象陽位而陰爻陽則男而陰則穉也故蒙六五亦曰童觀以近為明初六去二陽最遠故為兒童之觀遯大壯四陽二陰之卦曰君子好遯小人否曰君子用壯小人用罔觀四陰二陽亦拳拳於君子小人之分蓋以小人而可如此者君子慎不可如此也其愛君子之意至矣

六二闕觀利女貞

陰柔居內而觀乎外闕觀之象女子之正也故其占如此

夫得之則非所利矣○通曰闕坤闔之象柔居內而觀乎外有關觀象初二皆陰故皆有幼穉之象初位陽故為童二位陰故為女童觀是茫然无所見小人日用而不知者也闕觀是所見者小而不見全体仁者見之謂之仁知者見之謂之知者也占曰利女貞則非丈夫之所為可知矣

六三觀我生進退

我生我之所行也六三居下之上可進可退故不觀九五而獨觀已所行之通塞以為進退占者宜自審也○通曰三處上上下下之間有進退之象它卦三不中多不善二居中多善而觀以遠近取義故如此諸爻皆欲觀五惟近得之六四最近故可決於進六三上下之間可進可退之地故不必觀五

但觀我所為而為之進退本義曰占者宜自審蓋當進退之際唯當自審其所為如何耳

六四觀國之光利用賓于王

六四最近於五故有此象其占為利於朝覲仕進也○通曰下互坤土有國象兼兩爻而觀之有良光明象五居君位有王象以四承五有賓王象觀國之光四字下與童觀闕觀相反上與九五觀我生相應蓋國之光即九五所謂我生者特五之自觀則曰生方出於我者也有四觀五則曰光已達於國者也不指君之生而曰國者觀其達於國者則其出於君者可知矣

九五觀我生君子无咎

九五陽剛中正以居尊位其下四陰仰而觀之君子之象也故戒居此位得此占者當觀已所行必其陽剛中正亦如是焉則得无咎也○通曰觀八月卦已是肅殺之氣爻則屢以生言四陰小人道盛爻屢則以君子稱言外之意可想也生如木之生有本然後枝葉可觀觀其枝葉之茂則其本可見故九五之所謂觀我生者亦觀諸民而已本義以為戒辭者此也

上九觀其生君子无咎

上九陽剛居尊位之上雖不當事任而亦為下所觀故其戒辭畧與五同但以我為其小有主賓之異耳○通曰五上二陽皆為下之所觀五有德有位上有德无位有位則觀諸民

即所以觀我之所生无位即唯自觀其生而已本義曰以我為其小有主賓之異蓋觀我我對人而言觀其唯自觀而已

三三震下離上

噬嗑亨利用獄

噬齧也嗑合也物有間者齧而合之也為卦上下兩陽而中虛頤口之象九四一陽間於其中必齧之而後合故為噬嗑其占當得亨通者有間故不通齧之合則通矣又三陰三陽剛柔中半下動上明下雷上電本自益卦六四之柔上行以至於五而得其中是知以陰居陽雖不當位而利用獄蓋治獄之道唯威與明而得其中之為貴故筮得之者有其德則應其占也○通曰凡物不合由有間也必噬而後嗑嗑而後

亨不曰利用刑而曰利用獄者先之以電之明而雷從之也電之明所以察獄也雷之威所以決獄也雷電有時獄之用亦有時不至如頤中有物強梗者為之間獄豈宜用哉既明且威又柔且中治獄之道也不如是豈易用哉

初九履校滅趾无咎

初上无位為受刑之象中四爻為用刑之象初在卦始罪薄過小又在卦下故為屨校滅趾之象止惡於初故得无咎占者小傷而无咎也○通曰中四爻用刑者故稱噬上下二爻无位受刑者故无噬辭然曰校自有噬象或曰初之過小不必用噬上之罪大无所用噬趾乃人之所用以行者屨校滅趾懲之於初使不得行乃小人之福也小人受刑而所傷者

尚小故曰无咎无咎者四初受刑者无咎二三五用刑者无咎也刑不得已而用初免於過咎可矣繫辭傳於一卦而無釋二爻者唯噬嗑與解解難不可以急故於上六乃許君子之動噬惡不可以緩故於初則言小人之懲

六二噬膚滅鼻无咎

祭有膚鼎盖肉之柔脆噬而易嗑者六二中正故其所治如噬膚之易然以柔乘剛故雖甚易亦不免於傷滅其鼻占者雖傷而終无咎也○通曰膚柔脆因六取象鼻中正之体二象噬而言膚腊肺肉者取頤中有物之象也各爻雖取所噬之難易而言然因各爻自有此象故於其所噬者因而為之象耳六二柔而中正故所治如噬膚易入初剝未服反不能

无傷吾中正之体然始雖有傷終可无咎初之剝終可服也
六三噬腊肉遇毒小吝无咎

腊肉謂獸腊全体骨而為之者堅韌之物也陰柔不中正治人而人不服為噬腊遇毒之象占雖小吝然時當噬嗑於義為无咎也○通曰肉因六柔取象腊因三剝取象二至五互坎坎有毒象師有坎故釋豕亦曰毒六二柔居柔故所噬象膚之柔六三柔居剝故所噬象腊肉柔中有剛三比之二則難矣然三遇毒二亦滅鼻甚言夫刑之不可輕用也二三皆无咎三小吝中正不中正之分也

九四噬乾肺得金矢利艱貞吉

肺肉之帶骨者與歲通周禮獄訟入鈞金束矢而後聽之九

四以剝居柔得用刑之道故有此象言所噬愈堅而得聽訟之宜也然必利於艱難貞固則吉戒占者宜如是也○通曰肺肉之帶骨者骨因九取象肉因四取象離為乾卦故為乾肺腊肉藏骨柔中有剝六三柔居剛故所噬如之古者以兩造禁民訟以兩造聽之而无所徧受則不直者自反而民訟禁矣入束矢於朝不直則入其矢所以懲不直也以兩劑禁民獄以兩劑聽之而无所徧信則不信者自反而民獄禁矣入鈞金三日乃致於朝不信則入其金所以懲不信也三遇毒則治人之不服也四得金矢其人服矣然必艱難正固乃吉

六五噬乾肉得黃金貞厲无咎

噬乾肉難於膚而易於腊肺者也黃中色金亦謂鈞金六五柔順而中以居尊位用刑於人人无不服故有此象然必貞厲乃得无咎亦戒占者之辭也○通曰乾因五取象肉因六取象噬膚噬腊肉噬乾肺一節難一節六五噬乾肉易矣五君位也以柔居剛柔而得中用獄之道何難之有然六三亦以柔居剝遇毒何也六三柔不中正故噬之難而且遇毒六五柔而得中故噬之易而又得黃金或曰九四金矢兼得五獨言得黃金何也曰獄訟而出金矢已非尋常小小之訟訟則出矢獄則出金訟為小獄則大矣九四於獄訟兼得大小兼理之也五君位也非大獄不敢以聞書所謂罔攸兼于庶獄是也故獨曰得黃金亦君臣之分也本義鈞金束矢之說

極為有據然以鼎金鉉例之謂九四金剛而近五之中直故曰金矢六五黃中而近四之用剛故曰得黃金君臣相得剛柔相濟亦皆用獄之道也宜兼存之貞厲與九四艱貞同蓋必如此而後吉而後无咎不然雖有得猶不能无咎也

上九何校滅耳凶

何負也過極之陽在卦之上惡極罪大凶之道也故其象占如此○通曰本義於初曰過小於上曰惡極蓋過而不改必流於惡初能改過是止惡於始故曰无咎上則怙惡於終直曰凶矣滅耳有二義刑莫重於耳故古之馘者以耳或曰耳在上人所用以聽者以剛居中不聽人言以至此也

三三

離下
艮上

賁亨小利有攸往

賁飾也卦自損來者柔自三來而文二剝自二上而文三自既濟而來者柔自上來而文五剝自五上而文上又內離而外艮有文明而各得其分之象故為賁占者以其柔來文剝陽得陰助而離明於內故為亨以其剝上文柔而艮止於外故小利有攸往○通曰无本不立无文不行有賁之文所以能亨然不過小利有所攸往而已何者本為大文為小也至彖傳乃分上下体言亨與小利有攸往亦謂有本而後有文內離則質本剝而柔文之故亨外艮則質本柔而剝文之故小利有攸往

初九賁其趾舍車而徒

剛德明體自賁於下為舍非道之車而安於徒步之象占者自處當如是也○通曰壯初剝居剝而健體故壯者趾賁初剝居剝而明體故賁其趾壯而壯于趾不安在下之分者也賁初豈不見有互坎之車廼舍之而徒步能安在下之分者也蓋易之義所乘者在下而乘之者在上初在下卦之下而无乘分也然曰賁其趾非徒安分而已舍車之嫌而徒行是不以徒為辱而自以義為榮也是故君子行義必於在下之時發足之初觀之

六二賁其須

二以陰柔居中正三以陽剝而得正皆无應與故二附三而動有賁須之象占者宜從上之陽剛而動也○通曰爻自三

至上有頤象二在頤下有須象本義以二與三皆无應故二自附三而動如須附頤而動二柔中正三剝正得所附矣九三賁如濡如求貞吉

一陽居二陰之間得其賁而潤澤者也然不可溺於所安故有求貞之戒○通曰互坎有濡義亦有陷義既未濟濡首濡尾濡而陷者也九三非不貞也能求其貞則二陰於我為潤澤之濡我於彼不為陷溺之濡矣

六四賁如皤如白馬翰如匪寇婚媾

皤白也馬人所乘人白則馬亦白矣四與初相賁者乃為九三所隔而不得遂故皤如而其往來之心如飛翰之疾也然九三剝正非為寇者也乃求婚媾耳故其象如此○通曰二

與五三與上非應則亦非相賁者惟四以初之應為賁而為
三所隔所謂賁如者皤如矣皤白也日皤如又日白馬者人
與馬俱白象六四德與位俱柔也白馬而日翰如六四得陰
柔之正下求初九陽剛之正雖為三所隔而其往求之心如
飛翰之疾也然三剛正亦非與已為寇乃欲與已為婚媾爾
此與屯之六二相似屯剛柔始交賁剛柔相雜皆有婚媾之
象然屯之二乘馬班如應五之心何其緩賁之四白馬翰如
應初之心何其急時不同也屯二應五下求上也不可以急
賁四應初上求下也不可以緩
六五賁于丘園束帛戔戔吝終吉
六五柔中為賁之主敦本尚實得賁之道故有丘園之象然

陰性吝嗇故有束帛戔戔之象束帛薄物戔戔淺小之意人
而如此雖可羞吝然禮奢寧儉故得終吉○通曰諸家多言
賁于丘園之賢本義謂不賁于市朝而賁于丘園敦本也束
帛戔戔尚儉也陰性吝嗇而終吉林放問禮之本夫子答與
其奢也寧儉即此意也聖人謂賁以文飾成卦後世必有因
飾而過者故於五明敦本尚儉之為吉又於上見賁極反本
之為无咎也

上九白賁无咎

賁極反本復於无色善補過矣故其象占如此○通曰初取
上下之義賁其趾下象也上取始終之義文之極則反為質
白賁終象也賁上卦言白馬言束帛戔戔終言白賁雜卦曰

賁无色也可謂一言以蔽之矣履禮也初素履往无咎賁文也終白賁无咎其反賁之文而為履之素歟

三三坤下艮上

剥不利有攸往

剥落也五陰在下而方生一陽在上而將盡陰盛長而陽消落九月之卦也陰盛陽衰小人壯而君子病又內坤外艮有順時而止之象故占得之者不可有所往也○通曰剥落之也五陰剥一陽欲剥之以至於盡陽无可盡之理也否三陰三陽陰陽猶相等且曰不利君子貞剥五陰而一陽小人盛而君子孤如之何可有所往哉雖然一變而復利有攸往矣○初二四剥陽故凶三應陽故无咎五承陽无不利

初六剥床以足蔑貞凶

剥自下起滅正則凶其故占如此蔑滅也○通曰上實而下虛牀象足在下初象正道在天地間不可一日无也本義曰剥自下起滅正則凶盖方其剥之自下未至於蔑貞也而曰滅貞則凶戒小人之辭也

六二剥牀以辨蔑貞凶

辨牀幹也進而上矣○通曰剥自下起剥床以辨進而上矣然二陰為遯猶未至於蔑貞也辭與初同亦戒之也

六三剥之无咎

眾陰方剥陽而已獨應之去其黨而從正无咎之道也占者如是則得无咎○通曰剥之三即復之四視二五非中然在

五陰之中即為中復六四在五陰中獨與初應不許以吉剥
六三在五陰中獨與上應許以无咎何也曰復君子之事明
道不計功不以吉許之可也剥小人之事小人中獨知有君
子不以无咎許之无以開其補過之門也○剥去上下四陰
而後陽爻无咎則陰剥陽也

六四剥床以膚凶

陰禍切身故不復言蔑貞而直言凶也○通曰本義曰蔑貞
則凶蓋猶許其不蔑貞則猶未至於凶也剥而及膚小人豈
不欲蔑貞哉然正道終不可得而滅故不復言滅貞而直言

凶亦豈獨君子之凶哉

六五貫魚以宮人寵无不利

魚陰物宮人陰之美而受制於陽者也五為眾陰之長當率
其類受制於陽故有此象而占者如是則无不利也○通曰
剥五不取君位如坤遯明夷歸妹旅皆非君之所處也剥而
至於五是為剥之極故五不取剥義別設為貫魚宮人寵之
象者所以開小人改過迁善之門也五為群陰之尊能率其
類受制於陽无不利矣剥床自足而辨辨而膚陰以次而剥
陽也后以宮人備數進御於君望前先卑望後先尊亦次而
承陽聖人至是則戒之曰與其次以剥陽而至於凶孰若以
次承陽之為利哉彖曰不利有攸往為君子戒也此曰无不
利為小人勉也

上九碩果不食君子得輿小人剥廬

一陽在上剥未盡而能復生君子在上則為眾陰所載小人居之則剥極於上自失所覆而无復碩果得輿之象矣取象既明而君子小人其占不同聖人之情益可見矣○通曰此一陽也在坤之月則剥之盡而生在此則剥未盡而能復生指陽之性言也故有取於碩果不食之象艮為果菰艮上陽下陰果陽而菰陰乾為木果眾陽皆變而上獨存有碩果不食象果中有仁天地生生之心存焉碩果專以象言得輿剥廬象兼占而言蓋君子而占得此有在上而為眾陰所載之象小人占之則有剥極於上自失其所庇之象然則小人剥廬亦戒辭也牀上之藉下以安者也廬下之藉上以安者也始而剥床欲上失所安今而剥廬自失所安矣自古小人欲

害君子亦豈小人之利哉

三三震下坤上

復亨出入无疾朋来无咎反復其道七日來復利有攸往

復陽復生於下也剥盡則為純坤十月之卦而陽氣已生於下矣積之踰月然後一陽之体始成而來復故十有一月其卦為復以其陽既往而復反故有亨道又内震外坤有陽動於下而以順上行之象故其占又為已之出入既得无疾朋類之来亦得无咎又自五月始卦一陰始生至此七爻而一陽来復乃天運之自然故其占又為反復其道至於七日當得來復又以剝德方長故其占又為利有攸往也反復其道往而復来来而復往之意七日者所占來復之期也○通曰

本義於剝之碩果曰剝未盡而能復生至此則曰剝盡為純坤十月之卦而陽氣已生於下何也蓋陽元頌生之理故先天卦序剝而坤坤而後復陽无可盡之理故後天卦序則以復次剝其曰剝未盡而能復生者指果之仁而言也可見其所以為元者未嘗息其曰坤十月陽氣已生於下積之踰月然後一陽之體始成而來復可見其所以至於亨者未嘗驟前乎此自姤而剝陰在內為主陽常行逆境今自剝而復陽在內為主陽方往順境其占始亨已之出入而得无疾者一陽順而亨也朋類之來亦得无咎者衆陽將順而亨也是皆陽動而順之象也反復其道統言陰陽來往其理如此七日來復專言一陽方來其數如此利有攸往則其占又言一陽

之長也可往而為臨為泰以至於乾也

初九不遠復无祗悔无吉

一陽復生於下復之主也祗悔也又居事初失之未遠能復於善不抵於悔大善而吉之道也故其象占如此○通曰春秋公孫敖於京師不至而復公如晉至柯乃復皆以不極其往為復復善貴早故易以不極其往者言之善失之遠而復必至有悔惟失之未遠而即復所以不抵於悔无吉本義大善而吉是從事上說一本向善而吉是從心上說讀者詳焉○本心呈露之初

六二休復吉

柔順中正近於初九而能下之復之休美吉之道也○通曰

遯賁遠莫遠於上九而九五能比之故曰嘉遯遯之美者也
復賁不遠初九曰不遠復而六二能比之故曰休復復之美
者也里仁為美亦此意歟○似剝五

六三頻復厲无咎

以陰居陽不中不正又處動極復而不固屢失屢復之象屢
失故危復則无咎故其占又如此○通曰三上下進退之間
故曰頻巽以柔為主九三剛而不中失之矣以其比柔故頻
巽復以剛為主六三柔而不中失之矣以其位剛故頻復頻
巽吝頻復雖厲无咎此又不同也

六四中行獨復

四處群陰之中而獨與初應為與眾俱行而獨能從善之象

當此之時陽氣甚微未足以有為故不言吉然理所當然吉
○非所論也董子曰仁人者正其誼不謀其利明其道不計
其功於剝之六三及此文見之○通曰泰二夬五曰中行二
五上下之中也益三四曰中行三四在一卦之中也此曰中
行六四在五陰之中也然則二五之中中也或以三四為中
隨時以取中也四在五陰中獨應初九有獨復之象猶夬九
三在五陽中獨遇上六亦曰獨行遇雨然彼之獨何如此獨
哉○與剝六三同

六五敦復无悔

以中順居尊而當復之時敦復之象无悔之道也○通曰敦
艮者坤之土而降其上者也臨上為敦臨中三畫互坤此為

又曰不遠復入德之事也
敦復其成德之事歟

敦復中三畫亦互坤也本有坤體又互坤厚之至也故曰敦
諸家於此爻皆輕看殊不知不遠復者善心之萌敦復者善
行之固故初九无祗悔敦復則其復也无轉移自然无悔矣
上六迷復凶有災眚用行師終有大敗以其國君凶至于十年
不克征

以陰柔居復終終迷不復之象凶之道也故其占如此以猶
及也○通曰坤體而居上體之上先迷者也迷不特凶又有
天災有人眚用行師終有大敗及其國君亦凶至于十年終
不能行爻之凶未有如此之甚者爻之辭未有如此之煩而
不殺者甚言迷復之不可也迷復與不遠復相反初不遠而
復迷則遠而不復敦復與頻復相反敦无轉易頻則屢易獨

言不遠復入德之事也敦復其成德之事歟

復與休復相似休則比初獨則應初也十年不克征亦七日
來復之反乾无十坤无七陰數極於六而七則又為乾之始
陽數極於九而十則自為坤之終故凡言十年者坤終之象
也屯十年乃字願十年勿用皆互坤

三三 震下 乾上

无妄元亨利貞其匪正有眚不利有攸往

无妄實理自然之謂史記作无望謂无所期望而有得焉者
其義亦通為卦自訟而變九自二来而居於初又為震主動
而不妄者也故為无妄又二体震動而乾健九五剛中而應
六二故其占大亨而利於正者其不正則有眚而不利有所
往也○通曰朱子解中庸誠字以為真實无妄之謂此解无

妄則以為實理自然之謂自然二字已兼无所期望之意矣其占元亨而必利於貞者无妄誠也正而固誠之者也不正則妄矣占辭曰貞曰匪貞曰利曰不利其辭一正一反聖人示戒深矣哉爻辭與卦辭同初九九五六二正也故初九曰往吉六二曰利有攸往九五曰有喜六三上九不正也故曰災眚九四亦不正故戒以固守則无咎

初九无妄往吉

以剛在内誠之主也如是而往其吉可知故其象占如此○通曰彖曰剛自外来而為主於内本義於此曰以剛在内誠之主也主字最有力盖妄者誠之反也誠之主如此妄自然无矣如此而往其吉固宜或曰此占辭也本義以為象者何

也曰初九剛主於内誠之主之象也

六二不耕獲不菑畲則利有攸往

柔順中正因時順理而无私意期望之心故有不耕獲不菑畲之象言其无所為於前无所冀於後也占者如是則利有所往也○通曰耕獲者種而斂之也菑畲壟而熟之也諸家以為不耕而獲不菑而畲是從外添一而字惟本義以為一歲之農始於耕終於獲三歲之田始於菑終於畲不耕獲不菑畲六二柔順中正終始无所作為之象而必曰因時順理者理本自然无所作為亦有時可如此不煩作為者六二柔順之至因其時順其理自始之終絕計功謀利之心无所望而有得焉者也故其占曰利有攸往或曰利有攸往則宜於

有為矣而以為无所作為者何也曰惟其因時順理而不自作為此其所以可有為也

六三无妄之災或繫之牛行人之得邑人之災

卦之六爻皆无妄者也六三處不得正故遇其占者无故而
有災如行人牽牛以去而居者反遭詰捕之擾也○通曰匪
正有青人自為之也无妄之災天實為之也六爻皆无妄三
之時則无妄而有災者也六二得位而有无妄之福時也六
三失位而有无妄之禍亦時也行人牽牛而去居者反受詰
捕之擾其災出於意料之外雜卦曰无妄災其此之謂歟○
三居内邑人也四居外行人也三以柔居剛則失其順失牛
者也四以剛居柔則得其順得牛者也失非其所當失得非

其所當得皆不正矣因行人之得致邑人之災非邑人所自為也

九四可貞无咎

陽剛乾体下无應與可固守而无咎不可以有為之占也○
通曰貞正而固也曰利貞則訓正字而兼固之義曰可貞則
專訓固字而无正之義不可不辨九四陽剛乾体下无應與
僅可貞固守之而其占不可有為不如初之吉亦不至如上
之凶僅得无咎而已

九五无妄之疾勿藥有喜

乾剛中正以居尊位而下應亦中正无妄之至也如是而有
疾勿藥而自愈矣故其象占如此○通曰豫六五以柔乘剛

貞病固宜无妄九五剛健中正下應柔順中正无望之至者也如是而有疾文王羨里之囚周公流言之變也不殄厥愠亦不殞厥問公孫碩膚德音不瑕文王周公之疾不藥而自愈矣

上九无妄行有眚无攸利

上九非有妄也但以其窮極不可行耳故其象占如此○通曰六爻皆无妄也特初九得位而為震動之主時之方來故无妄往吉上九失位而居乾剝之極時已去矣故其行雖无妄有眚无攸利是故善學易者在識時初曰吉二曰利時也三曰災五曰疾上曰眚非有妄以致之也亦時也初與二皆可往時當動而動四可貞五勿藥上行有眚時當靜而靜

三三 乾上 艮下

大畜利貞不家食吉利涉大川

大陽也以艮畜乾又畜之大者也又以內乾剛健外艮篤實輝光是以能日新其得而為畜之大也以卦變言此卦自需而來九自五而上以卦体言六五尊而尚之以卦德言又能止健皆非大正不能故其占為利貞而不家食吉也又六五下應於乾為應乎天故其占又為利涉大川也不家食謂食祿於朝不食於家也○通曰大畜大壯皆四陽卦也故皆謂之大莫占皆曰利貞者大壯而不貞其壯也剛而无禮大畜而不貞其畜也博而寡要不家食是賢者不畜於家而畜於朝涉川又似有畜極而通之意要之兩利字一吉字占辭自

分而為三不必泥而一之可也

初九有厲利已

乾之三陽為艮所止故內外之卦各取其義初九為六四所止故其占為往則有危而利於止也○通曰他卦取陰陽相應此取相畜內卦受畜以自止為義外卦能畜以止之為義獨三與上居內外卦之極畜極而通不取止義初九為四所止其勢本危而初性健欲進故曰利已戒之之辭也

九二輿說輻

九二亦為六五所畜以其處中故能自止而不進有此象也
○通曰大畜九二說輻與小畜九三說輻不同辯已見小畜
程子曰初與二乾體剛健而不足以進四五陰柔而能止時

之盛衰勢之強弱學易者所當深識也雜卦曰大畜時也其此之謂乎初剛居剛性欲上進曰利已者勉其止也二剛中自能止而不行可謂知時者也

九三良馬逐利艱貞曰閑輿衛利有攸往

三以陽居健極上以陽居畜極而通之時也又皆陽爻故不相畜而俱進有良馬逐之象焉然過剛銳進故其占必戒以艱貞閑習乃利於有往也曰當為日月之日○通曰閑習也日閑猶言時習閑輿衛又因二之輿三之馬取象輿者乘內之二陽衛者防外之二陰良馬逐者上一陽與已同志三逐上以進而下二陽又逐三以進之象也初利已戒其進也二說輻喜其不進也三可進矣而猶戒之艱難貞固日閑輿

衛之事者懼其可進而銳於進也二之與既說輻而不進三復開其衛而不輕進至是則初之利已者三可利往矣

六四童牛之牯元吉

童者未角之稱牯施橫木於牛角以防其觸詩所謂楅衡者也止之於未角之時為力則易大善之吉也故其象占如此學記曰禁之於未發之謂豫正此意也○通曰祭天地之牛角繭栗童則猶未有角其天全矣此時牯之禁於未發者也不用力甚易故其占大善而吉然六四有牯牛之吉反而无妄之六三又值縶牛之災亦可以知時矣○四畜初

六五豮豕之牙吉

陽已進而止之不若初之易矣然以柔居中而當尊位是以

得其機會而可制故其象如此占雖吉而不言元也○通曰初之陽未進而止之用力猶易二陽已進則亦難矣六五柔中居尊故得其機會而可制如豮豕然：已不如初之易故曰吉而不如初之元吉或曰牛與豕皆陰物而以象陽者何曰牛之剋在角豕之剋在牙四五下畜二剋蓋取童牛防其角豮豕防其牙之象也○畜二上九何天之衢亨

何天之衢言何其通達之甚也畜極而通豁達无礙故其象占如此○通曰隨畜隨發不足為大畜惟畜之極而通豁達无礙如天衢然何之一字讚之：辭也蓋曰是何通達之甚如此也此不特為仕進之占大學章句所謂用力之久一旦

周易本義通釋
豁然貫通者亦此意也識前言往行以畜其德者當如之

三三震下
艮上

頤貞吉觀頤自求口實

頤口旁也口食物以自養故為養義為卦上下二陽內含四陰外實內虛上止下動為頤之象養之義也貞吉者占者得正則吉觀頤謂觀其所養之道自求口實謂觀其所以養身之術皆得正則吉也○通曰需頤蹇旅卦辭皆言貞吉蹇旅非處順境失正則不吉需頤飲食之養尤易於失正也故不貞亦不吉觀頤謂觀頤之象於卦也自求口實謂自求頤之道於已也頤中虛有口象觀象於頤二陽而函四陰无有不正自求口實惟反觀吾之養者正與不正尔○陽能養陰

受養於陽初上二陽乃養人者中四陰乃受養於人者

初九舍尔靈龜觀我朵頤凶

靈龜不食之物朵垂也朵頤欲食之貌初九陽剛在下足以不食乃上應六四之陰而動於欲凶之道也故其象占如此○通曰離為龜頤似離故有龜象猶兌為羊大壯似兌爻亦取羊象靈龜以靜為養者也朵頤以動為養者也初九一陽居四陰互坤之下自有靈龜伏地養氣之象乃自舍之觀六四而朵頤焉朵下垂也震下凡八卦惟頤最凶以其動於口体之欲故也或曰觀三五皆曰觀我各指本文而言此曰觀我獨指外文而言何也盖惟靈龜可貴也自不知貴故爾之在此者為尔則在彼反為主而以我称矣中孚九二曰我有

好爵吾與尔靡之此為我則彼為尔尔我二字理欲内外之分如此其嚴哉

六二顛頤拂經于丘頤征凶

求養於初則顛倒而違於常理求養於上則往而得凶立土之高者上之象也○通曰初上二陽衆陰所資以養者也二在初之上反受養於初則為顛頤又違五正應則為拂經若往而求養於上必有凶六二在他卦為柔順中正在頤則為動於口体初動於六四二則下為初九所動上為上九所動兩有所養一无所利艮為山上九在外而高有丘象

六三拂頤貞凶十年勿用无攸利

陰柔不中正以處動極拂於頤矣既拂於頤雖正亦凶故其

象占如此○通曰諸家多謂拂頤之貞故凶本義謂既拂於頤雖正亦凶蓋謂之拂頤貞疑與拂經同意但曰拂頤則又不止拂經而已雖真亦凶况不貞乎三陰柔不中正又居動極人皆求頤於上三獨拂之而隨下体之動是自拂於頤矣故不但日凶且日十年勿用无攸利下三爻皆以動故凶此又動之極故九凶十數之終互坤象○三上應拂之而隨下体之動故凶

六四顛頤吉虎視眈眈其欲逐逐无咎

柔居上而得正所應又正而賴其養以施於下故顛頤而吉虎視眈眈下而專也其欲逐逐求而繼也又能如是則无咎矣○通曰頤似離、為目故初於四曰觀四於初曰視人之

食也口必下垂初應四而動於下故有朵頤之象虎之視者
首必下垂四之求初下而專故有虎視之象二與四柔順得
正皆曰顛頤而吉凶不同何也卦有二陽衆陰所資以養者
二下比初之陽又欲上求上之陽兩用其心故凶六四柔正
惟知下應初剛上非其應也虎視眈眈下視初九之陽而專
不以上之陽間之也其欲逐逐又繼於初之陽者不已也求養
於下以養人求之既專而欲又繼繼求之不厭乎數故其養人
也不窮非特吉且无咎也

六五拂經居貞吉不可涉大川

六五陰柔不正居尊位而不能養人反賴上九之養故其象
占如此○通曰二與四言顛頤者皆在初之上而反求養於

初也五與二皆言拂經者二五相應經也今則二拂五而求
養於初五拂二而求養於上也五獨不言頤者由豫在九四
故五獨不言豫由頤在上九故五獨不曰頤也然彼貞疾而
此居貞吉彼在豫之時以柔乘剛此在頤之時以柔乘剛也
六二亦拂經而彼曰凶此曰吉何也曰下三爻動皆凶上三
爻靜皆吉故曰征凶動而凶也曰居貞吉靜而吉也居貞吉
猶洪範用靜吉謂自養可也不可涉大川猶洪範用作凶謂
欲以養人不可也艮為止有居之象

上九由頤厲吉利涉大川

六五賴上九之養以養人是物由上九以養也位高任重故
厲而吉陽剛在上故利涉川○通曰六五君也君不養人而

賴上九之養以養天下是上九者願之由位高任重雖危而吉五不可涉大川而上則利涉大川五柔而上剛也中虛有舟象故曰涉川

三三 巽上

大過棟橈利有攸往亨

大陽也四陽居中過盛故為大過上下二陰不勝其重故有棟橈之象又以四陽雖過而二五得中內巽外說有可行之道故利有攸往而得亨也○通曰上棟下宇取諸大壯壯四陽在二陰之下其本壯也今二陰在上下本末弱矣故有棟橈之象或曰既言棟橈又曰利有攸往亨何也曰棟橈以卦象言也利往而後亨是不可无大有為之才而天下亦无不

可為之事也以占言也

初六藉用白茅无咎

當大過之時以陰柔居巽下過於畏慎而无咎者也故其象占如此白茅物之潔者○通曰成卦以棟橈為象三四爻亦取棟象使六爻不出乎棟橈之一說則是付天下之事於不可為而後已是故聖人於初見其以柔承衆剛易缺折而柔以藉之則无傷如物錯地可矣而必有以藉之藉用茅可矣而必用白茅戒慎恐懼之過也故其占如此

九二枯楊生稊老夫得其女妻无不利

陽過之始而比初陰故其象占如此稊根也榮於下者也榮於下則生於上矣夫雖老而得女妻猶能成生育之功也○

通曰巽為木兌為澤楊近澤之木故以取象枯楊大過象梯根也初在下象老夫九象女妻初柔在下象九二陽雖過而下比於陰如枯楊雖過於老梯榮於下則復生於上矣夫老而得女妻雖過以相與終能成生育之功无他以陽從陰過而不過生道也雖然女嫁士夫常也遇老夫過也自古君臣過以相與者多矣吁可嘆也

九三棟橈凶

三四二爻居卦之中棟之象也九三以剛居剛不勝其重故象橈而占凶○通曰屋以棟為中三視四則在下棟橈於下之象四在上棟隆於上之象然三之橈有二以剛居剛過剛則折一也應上之柔柔不能輔二也所以凶

九四棟隆吉有他吝

以陽居陰過而不過故其象隆而占吉然下應初六以柔濟之則過於柔矣故又戒以有他則吝也○通曰九四棟隆亦有二義剛而能柔一也三應上是救其末四應初是救其本上六以柔居柔為陰之極初六以柔居剛猶可不橈乎下二也蓋惟其柔而居剛故二比之則如梯之復生於下四應之則如棟之不橈乎下也有他吝王弼以來多以他為初愚按易中未有以正應為他者子夏傳曰非應故稱他夫子釋爻於三之應上則曰不可以有輔言上為末不可輔棟之橈也四之應初則曰不橈乎下也下不橈則上隆矣四不應初而有他則吝爾况大過上下体易則為中孚本義以中孚之初

有它為不應四也則大過之四有它謂不應初可也是說也
惟鄭翼傳知之未敢必以為然安得從先師而質之哉

九五枯楊生華老婦得其士夫无咎无譽

九五陽過之極又比過極之陰故其象占皆與二反○通曰
枯陽而稊可以復生枯楊而華速其死也老夫得其女妻猶
可生育士夫而有老婦无復生道矣故反稱老婦得其士夫
謂上六陰柔過極得陽不為无益尔无咎者陰欲得陽非陽
之咎也然亦非美矣

上六過涉滅頂凶无咎

處過極之地才弱不足以濟然於義為无咎矣蓋殺身成仁
之事故其象占如此○通曰初六藉用白茅過於畏慎者也

故无咎上六過涉滅頂過於決裂者也故其事雖凶於義亦
无咎然亦惟其時而已初者事之端能慎其端以往可无失
上者事之極極則不可以有為矣故本義以殺身成仁之事
當之

三三坎上下

習坎有孚維心亨行有尚

習重習也坎險陷也其象為水陽陷陰中外虛而中實也此
卦上下皆坎是為重險中實為有孚心亨之象以是而行必
有功矣故其占如此○通曰六子卦皆重此獨一習字或以為
序卦居六子之先坎言重他可知矣或以為人之腎象之龜
蛇方曰此曰翔而太玄配罔與冥皆有重義他卦亨字本義

例以為占惟此則曰中實為有孚心亨之象蓋它卦言占事之亨也此言象心之亨也陽實有孚之象陽明在內心亨之象心有主則實此心見得事理實是如此心既通透由是斷然行之而无疑不然此心微有不通即是險阻即不可行矣故本義以亨為象有尚為占也

初六習坎入于坎窞凶

以陰柔居重險之下其陷益深故其象占如此○通曰初六六三皆以陰居坎下初又下卦之下也水性本下而又歸下坎體本陷而又居陷中之陷故皆入于坎窞其占之凶故宜九二坎有險求小得處重險之中未能自出故為有險之象然剛而得中故其占

可以求小得也○通曰初在重險之下其占曰凶三在重險之間其占曰勿用二之占乃曰求小得何也剛得中故也剛得中而僅小得何也豫九四互坎而大有得坎剛動乎坤順之上故不求而所得者大坎之剛陷於坎險之中故雖求之而所得者小

六三來之坎坎險且枕入于坎窞勿用

以陰柔不中正而履重險之間來往皆險前險而後枕其陷益深不可用也故其象占如此枕倚着未安之意○通曰乾九三在兩乾之間故曰乾乾坎六三在兩坎之間故曰坎坎來而下固坎之而上亦坎也本義曰前險而後枕枕有兩意謂下卦為前險而六三枕之可也謂六三處前險而四又枕

之亦可也初與三皆曰入于坎窞彼凶此但勿用彼之入未能出此之入將可出也

六四樽酒簋贰用缶納約自牖終无咎

晁氏云先儒讀樽酒簋為一句貳用缶為一句今從之貳益之也周禮大祭三貳弟子職左執虛豆右執挾七周旋而貳是也五居尊位六四近之在險之時剛柔相濟故有但用薄禮益以誠心進結自牖之象牖非所由之正而窒之所以受明也始雖艱阻終得无咎故其占如此○通曰學易不可不知時損之後必益故二簋用有時坎之上又坎故一簋貳用缶本義曰貳用缶為益以誠心之象蓋缶之器質有誠實象酒簋之禮至薄當坎之時不得已而用之非益之以誠不可

行也納約不自戶而自牖亦坎之時不得已也自牖象坎險之時不可直致猶遇主于巷象睽乖之時不可直行也其占曰終无咎始猶艱難也

九五坎不盈祗既平无咎

九五雖在坎中然以剛陽中正居尊位而時亦將出矣故其象占如此○通曰坎不盈猶有險也既平則无險矣二處重險之中五將出重險之外所以二有險不如五既平也

上六係用徽纆寘于叢棘三歲不得凶

以陰柔居險極故其象占如此○通曰係之徽纆而又寘于叢棘重險象三歲亦復不得出以陰柔處坎險之極故也

三三 離上 離下

離利貞亨畜牝牛吉

離麗也陰麗於陽其象為火體陰而用陽也物之所麗貴乎得正牝牛柔順之物也故占者能正則亨而畜牝牛則吉也○通曰本義於坎曰中實而外虛則知離中虛而外實於離曰體陰而用陽則知坎體陽而用陰互見也夫麗則易至於不正麗而正則亨矣必畜牝牛而乃吉何也坎之明在內剛健而行之於外離之明在外當柔順以養之於中也况坎水潤下愈下則陷矣故以行為尚離火焚上愈上則焚矣故以止為吉

初九履錯然敬之无咎

以剛居下而處明體志欲上進故有履錯然之象敬之則无咎矣戒占者宜如是也○通曰物相雜故曰文初以剛居下而明體志欲上進必與上接接則剛柔相雜而文生焉二方相接成文敬之可无咎本義以為戒辭者雜則易流於不敬故也况需上六柔順故於下之三陽能敬之離初九剛躁於二之一陰未能敬之也故以為戒

六二黃離元吉

黃中色柔麗乎中而得其正故其象占如此○通曰離六二以黃離言者離之二自坤來也二與五皆自坤來而五不以黃離言者坤五爻皆臣道故於五曰黃裳元吉離五君二臣故於二曰黃離元吉况離性炎上上之中又不如下之中為元吉也

九三日昃之離不鼓缶而歌則大耋之嗟凶

重離之間前明將盡故有日昃之象不安常以自樂則不能自處而凶矣戒占者當如是也○通曰日昃晝而將夜也晝之必夜生之必死皆常道也缶常用之器不鼓缶而歌是不安常以自樂也不安其常則不能自處而以大耋為嗟矣嗟者歌之反故凶

九四突如其來如焚如死如棄如

後明將繼之時而九四以剛迫之故其象如此○通曰離以二五為主本義所謂前明後明者指二與五也三至三則前明將盡四近五則後明將繼突如其來四迫五也坎三離四正上下之交故兩卦於此深致意焉坎性下三在下卦之上

故曰來來而下也離性上四在上卦之下故曰突如其來來而上也水本下又來而下入于坎窞而後已火本上又來而上焚如死如棄如而後已然坎之三有枕象三枕下之險而四又下枕三故三之入也愈深離之四有突象四既上突而迫乎五三亦上突而迫乎四故四之焚也愈甚

六五出涕沱若戚嗟若吉

以陰居尊柔巖乎中然不得其正而迫於上下之陽故憂懼如此然後得吉戒占者宜如是也○通曰坎中有離自牖離虛明之象也離中有坎沱若坎水象也戚嗟若坎心憂象九三大耋之嗟以死生為憂者也不當憂而憂故凶六五戚嗟若居君位而能憂者也憂所當憂故吉

上九王用出征有嘉折首獲匪其醜无咎

剛明及遠威震而刑不濫无咎之道也故其象占如此○通
曰坎為法律故上六言用刑離為戈兵故上九言用兵兼坎
水內明外暗上六暗於外者也必陷於刑離火內暗外明上
九明於外者也可用行兵本義曰剛明及遠威震而刑不濫
蓋剛遠則威振故曰折首明遠則刑不濫故曰獲匪其醜
而或濫有嘉矣不无咎也

周易上經本義通釋卷之一

